

摘藻堂四庫全書薈要

史部

欽定四庫全書薈要卷八千八百八十六

明史紀事本末卷七十四

浙江提學僉事谷應泰編

宦侍誤國

熹宗天啓七年秋八月懷宗踐祚冬十月魏忠賢伏誅  
南京守備太監楊朝浙直織造太監李實承天守備太  
監李希哲提督太和山太監馮玉天壽山太監孟進漕  
運太監李明道崔文昇並免上御日講畢召閣臣入

便殿出薊遼督師王之臣疏示之曰王之臣自云贅員又云虛拘非內臣牽制之乎其盡撤各邊內臣十一月戊辰諭曰先朝於宣大薊遼東江諸地分遣內臣協鎮一柄兩操甚無謂矧宦官觀兵古來有戒其概罷之一切相度機宜俱聽經督節制無復委任不專以藉其口凡爾諸臣宜體此意先是自萬歷以來礦稅既行騷然苦之既而魏忠賢擅權敲骨剝髓天下重足而立上即位首罷之朝野翕然望至治焉

懷宗崇禎元年春正月命內臣俱入直非受命不許出禁門 二月諭戒廷臣結交近侍

二年夏四月以內官監太監曹化淳提督南京織造

秋七月以司禮太監曹化淳提督東廠 冬十一月我

大清兵南下始遣乾清宮太監王應朝監視行營太監馮

元昇覈軍訖始下戶部發餉又命太監呂直勞軍 十

二月以司禮監太監沈良佐內官太監呂直提督九門

及皇城門司禮太監李鳳翔總督忠勇營提督京營

三年春二月司禮太監曹化淳等各廕錦衣衛指揮僉事

四年秋九月命太監張彛憲總理戶工二部錢糧唐文征提督京營戎政王坤往宣府劉文忠往大同劉允中往山西各監視兵餉 冬十月命太監監軍王應朝往關寧張國元往薊鎮東協王之心中協邵希韶西協十一月以太監李奇茂監視陝西茶馬吳直監視登島兵餉初上既罷諸內臣外事俱委督撫然上英察輒以

法隨其後外臣多不稱任使者崇禎二年京師戒嚴乃復以內臣跡行營自是御憲四出動以威倨上官體加于庶司羣相壅蔽矣 罷工部郎中孫肇興肇興監督盛甲殿以帑訕疏劾張彛憲上怒落職

五年春三月工部右侍郎高弘圖上言臣部有公署中則尚書旁列侍郎禮也內臣張彛憲奉總理兩部之命儼臨其上不亦辱朝廷而褻國體乎臣今日之為侍郎也貳尚書非貳內臣國家大體臣固不容不慎故僅延

之川堂相賓主而公座毋寧已之雖大拂彞憲意臣不顧也且總理公署奉命別建則在臣部者宜還之臣部豈不名正言順而內外平上以軍興餉事重應到部驗核不聽弘圖遂引疾求去疏七上竟削籍 秋七月以司禮監太監曹化淳提督京營戎政 冬十二月南京禮部主事周鏞上言內臣用易而去難此從來之通患然不能遽去猶冀有以裁抑之今張彞憲用而高弘圖之骨鯁不可容矣金鉉之撫蘆雖幸免罪以他事中之

矣王坤用而魏呈潤以救胡良機處矣趙良曦以直糾  
扶同處矣鄧希詔用而曹文衡以互結投間矣王弘祖  
以禮數苛斥矣若夫孫肇興王弘祖之激直李曰輔熊  
開元之慷慨無不罷斥未能屈指尤可嘆者每讀邸報  
半屬內侍之溫綸從此以後草管臣子委棄天言祇狗  
中貴之心將不知所極矣上怒其切直削籍禮部員外  
郎袁繼咸疏救之不聽以司禮監右少監劉勞譽提  
督九門令百官進馬三品以上各貢一匹餘合進俱納



于御馬監實費金買之本監也否則雖駿驥亦却之

六年春正月大學士周延儒以宣府閱視太監王坤疏  
劾乞罷不允左副都御史王志道上言王坤不宜侵輔  
臣上召廷臣于平臺謂志道曰遣用內臣原非得已朕  
言甚明何議論之多也昨王坤之疏朕已責其誣妄乃  
廷臣舉劾莫不牽引內臣豈處分各官皆為內臣耶對  
曰王坤直劾輔臣舉朝皇皇為紀綱法度之憂臣為法  
度惜非為諸臣地也上曰廷臣於國家大計不之言惟

因內臣在鎮不利奸弊乃借王坤疏要挾朝廷誠巧佞也  
因詰志道者再周延儒曰志道非專論內臣實責臣等  
溺職上色稍霽曰職掌不修沽名立論何堪憲紀立命  
志道退延儒遂放歸 夏五月命司禮監太監張其鑑等  
赴各倉同提督諸臣盤驗收放 太監張應朝調南京與胡承  
詔協同守備 諭兵部流寇蔓延各路兵將功罪應有監紀  
特命太監陳大金閻思印謝文舉孫茂霖為內中軍會各撫  
道分入曹文詔左良玉諸營尋

復以閻思印同總兵張應昌合勅汾陽知縣費甲鏃以  
逼迫苦供億墜井死 六月命太監高起潛監視錦寧  
張國元監視山西石塘等路綜核兵餉 秋七月叙內  
臣守萊州功徐時得翟升各廕錦衣衛正千戶 命湖  
廣守備太監魏相監視登島兵餉

七年春二月監視登島太監魏相以給事中莊鰲獻上  
太平十二策內撤監視因求罷不允貶鰲獻于外 總  
理太監張昇憲請入覲官投冊以隆體統許之山西提

學僉事袁繼咸上言士有廉恥然後有風俗有氣節然  
後有事功如總理內臣有覲官費冊之令皇上從之特  
在剔釐奸弊非欲羣臣誣膝也乃上命一出靡然從風  
藩臬守令叅謁屏息得免呵責為幸嗟乎一人輯瑞萬  
國朝宗諸臣未覲天子之光先拜內臣之座士大夫尚  
得有廉恥乎逆璫方張時義子乾兒昏夜拜伏自以為  
羞今且白晝公庭恬不知怪國家自有覲典二百餘年  
未聞有此所為太息也上以越職言事責之既張彞憲

亦奏辯謂覲官叅謁乃尊朝廷繼咸復上言尊朝廷莫大於典例知府見藩臬行屬禮典例也見內臣行屬禮亦典例乎諸司至京投冊吏部各官典例也先謁內臣亦典例乎事本典例雖坐受猶以為安事創彛憲即長揖祇增其辱高皇帝立法內臣不得與外事若必以內臣繩外臣會典所不載上仍切責之 夏五月陝西按察司副使賀自鏡奏監紀太監孫茂霖玩寇宣府太監王坤奏監軍紀功罪耳追逐有將吏在果如自鏡言則

地方官罪不在茂霖下矣上不問 六月叙禁旅功廢

太監曹化淳世襲錦衣衛千戶袁禮楊進朝盧志德各  
百戶賜衣幣以擊盜屢捷也 罷各道監視太監諭曰

朕御極之初撤還內鎮舉天下事悉以委之大小臣工  
比者多營私罔恤民艱廉謹者又迂疎無通論已已之  
冬京都被兵宗社震恐此士大夫負國家也朕不得已  
用成祖監理之例分遣各鎮監視添設兩部總理雖一  
時權宜亦欲諸臣自引罪今經制粗立兵餉稍清諸臣

應亦知省其將總理監視等官盡行撤回以信朕之初  
心張彛憲俟漕竣即回監供職惟闕寧密邇外境高起  
潛兼監兩鎮暨內臣提督如故 秋七月發帑金蟒段  
給監軍太監高起潛賞功 九月司禮監太監張從仁  
改內官監提督九門 冬十月命兵部同內中軍張元  
亨崔良用往西寧監眎及茶馬御史易壯馬 總理戶  
工二部司禮太監張彛憲改司禮監提督 十一月侍  
讀倪元璐上言邊臣之情歸命軍容無事稟成為恭寇

至推委百出陽以號于人曰吾不自由也陛下何不信  
賞必罰以持其後而必使近習之人試之鋒鏑又使藉  
口迄用無成哉始陛下曰行之有績即撤今行之無績  
益宜撤不聽 十二月以乾清宮太監馬雲程提督京  
營戎政撤南京守備太監胡承詔張應朝以司禮太監  
梁洪泰內官太監張應乾協同守備

八年夏四月承運庫太監周禮言崇禎六年七年省直  
金花銀共逋八十九萬命趣之 冬十一月太監高起



潛弟廕錦衣衛中所正千戶世襲

九年夏六月命司禮太監曹化淳同法司錄囚 秋七

月我

大清兵至居庸遣內中軍李國輔守紫荆關許進忠守倒  
馬關張元亨守龍門關崔良用守固關勇衛營太監孫  
維武劉元斌以六千五百人防馬水沿河 兵部尚書  
張鳳翼督援兵出師以監視關寧太監高起潛為總監  
南援霸州遼東前鋒總兵祖大壽為提督同山海總兵

張時傑屬起潛給起潛金三萬賞功牌千購賞格 以  
前司禮太監張雲漢韓贊周為副提督巡城閱軍司禮  
太監魏國徵守天壽山尋以國徵總督宣府昌平京營  
御馬太監鄧良輔為分守太監鄧希詔監視中西二協  
太監杜勲分守 以張元佐為兵部右侍郎鎮守昌平  
時內臣提督天壽山者皆即日往上語閣臣曰內臣即  
日就道而侍郎三日未出何怪朕之用內臣耶 以司  
禮太監盧維寧總督天津通州臨清德州內中軍太監

孫茂霖分守

八月命科道各官分地督運從太監張

彝憲之言也召廷臣于平臺及河南道御史金光宸初  
光宸叅督師張鳳翼及鎮守通州兵部右侍郎仇維楨  
首叙內臣功為借援又請罷內臣督兵上勿善也是日  
上怒甚曰仇維楨方至通州爾即借題沽名欲重治之  
適大雷雨議謫 九月我

大清兵從建昌冷口還守將崔秉德請率兵過歸路總監  
高起潛不敢進揚言當半渡擊之偵騎報師已盡行四

日起潛始進石門山報斬三級 司禮監太監孫象賢

調南京同張彞憲守備 冬十月工部侍郎劉宗周上

言人才之不競非無才之患而無君子之患今天下即  
乏才亦何至盡出二三中官下每當緩急之際必依以  
大任三協有遣通津臨德有遣又重其體統等於總督

中官總督將置總督于何地是以封疆嘗試也且小人  
與中官每相引重而君子獨岸然自異故自古有用小  
人之君子終無黨比中官之君子皇上誠欲進君子退

小人而復用中官以叅制之此明示以左右袒也不報  
賜太監曹化淳等綵幣時各進馬也 叙京師城守

功太監張國元曹化淳廕指揮僉事各世襲賜金幣初  
化淳為京營提督收用降丁及守昌平俱散去至有叩  
京師城下者皆稱京營兵莫能辨 十一月叙禁旅功

太監劉元斌廕錦衣衛百戶 命御馬太監陳貴總監  
大同山西朱文炳分守御馬太監王夢弼分守宣府昌  
平鄭良輔協理 召兵部左侍郎王業浩司禮太監曹

化淳于平臺 十二月曹化雨加後軍都督府左都督  
世襲錦衣衛指揮僉事

十年春正月常熟張從儒訐錢謙益溫體仁修郅下之  
獄謙益嘗為王安作祠記太監曹化淳者故王安門下  
也謙益得免體仁尋致仕還

詳東林  
黨議

以御馬太監李

名臣提督京城巡捕王之俊副之司禮太監曹化淳提  
督東廠 分守津通臨德總理太監楊顯名叅前巡鹽  
御史張養高欽舜各侵稅額詔逮之時養先卒下撫按

錄其家 夏四月命南京守備太監孫象賢張雲漢同

兵部尚書范景文清覈兵馬械杖 總監太監高起潛

行部永平道劉景耀關內道楊于國俱恥行屬禮上疏

求免上謂總監原以總督體統行事罷于國降景耀二

級以後監司皆莫敢爭時監視之設止多一扣餉之人

監視欲滿則督撫鎮道皆有所恃以飾功掩過故邊吏

皆樂有監視而上方倚任中官不察也 秋七月工部

員外郎方璽謫外璽上言皇上親擒魏忠賢而手刃之

豈溺情閹豎者不過以外廷諸臣無一可用而借才及之况人臣感激聖恩苟知報答何論內外每見廷臣處地懸絕不若宮庭誓御効忠倍易凡此內臣徼茲曠典孰不欲棄捐頂踵以酬我皇上者不必鯁鯁過計也刑科給事中何楷駁其通內呈身吏部請削其籍上手改降三級謫外冬十一月以司禮太監曹化淳杜勲等提督京營孫茂霖分守薊鎮中西三協鄭良輔總理京城巡捕



十一年春正月任丘清苑涞水遷安大城定興通州各有司不法上內訪逮入責撫按不先劾為溺職近畿如此遠地可知命部院申飭 二月丙申城廬溝名拱樞城太監督役掠塗人受工民力為憊 冬十月以御馬太監邊永清分守薊鎮西協

十二年春正月叙緝奸功東廠太監王之心曹化淳廕錦衣衛百戶 二月以司禮太監崔琳清理兩浙鹽課賦稅 秋七月以司禮太監張榮提督九門王裕民總

督京營戒午門端門諸內臣延接朝士 九月以內官

監太監杜秩亨提督九門

十三年春三月詔撤各鎮內監還京 夏六月大學士

薛國觀免先是上召國觀語及朝士貪婪對曰使廠衛

得人朝士何敢如是東廠太監王化民在側汗浹沾背

於是專偵其陰事而國觀亦褊忮坐通賄敗

詳東林黨議

十四年夏四月召大學士周延儒入朝 秋八月辛酉

上幸太學以重修告成也正一真人張應京請扈從臨

雍先期司禮監太監王德化奉命率羣臣習儀于太學  
時比之唐魚朝恩講經元李邦寧釋奠事 九月改東  
廠提督京營者亦稱總督 冬十一月禁朝臣私探內  
閣通內侍于是待漏俱露立毋敢入直舍 十二月諭  
停內操勅內臣神宮等監及各司局庫等毋干外政并  
申戒廷臣毋交通近侍

十五年春正月罷提督京營內臣 御史楊伯願上言  
臣讀敕諭申結交內侍之律因稽高皇帝初無所謂緝

事之令臣工不法止于明糾無陰訐也臣待罪南城所見詞訟多假番役妄稱東廠甚者誣人作奸挾仇首告矣夫餌人以陷禍擇人而肆喙惟恐其不為惡又惟恐其不即罹於法揆之皇上泣罪解網之仁豈不傷哉伏願先寬東廠條例東廠寬而刑罰可以漸省抑臣復有請焉如臣子獲罪但勅撫按檻車送詣闕下未為不可若緹騎一遣有資者家門破散無資者地方斂餽為害匪淺上是之諭東廠所緝止于謀逆亂倫其作奸犯科

自有司存戒錦衣校尉奉使需擾 秋七月以司禮太  
監齊本正提督東廠王承恩提督勇衛營 冬十月誅  
司禮太監劉元斌初元斌監軍河南羣盜在陝洛元斌  
留歸德不敢進縱諸軍大掠殺樵汲者論功及論辟未  
得旨即奏辨上怒并誅太監王裕民

十六年夏五月以內官監太監王之俊提督京城巡捕  
練兵 秋七月戒廷臣私謁內侍果有事朝房商之

八月以司禮太監王承恩督察京營戎政韓贊周守備

南京 冬十二月前大學士周延儒有罪賜死延儒當  
中外交訐竟無能為上畫一策其罷內監撤廠衛內臣  
日夜文致之故延儒始終皆以璫敗初延儒受主眷深  
諸璫稍稍乘間媒孽上俱不信延儒益忽之不為慮迨  
視師行邊上意稍移而諸璫乃盡發其蒙蔽狀上信之  
吳昌時事發聖怒遂不可回矣

十七年春二月李自成自山西趨真定保定命太監高  
起潛等分據要害 三月李自成陷宣府太監杜勳迎

降入居庸關太監杜之秩迎降 以司禮太監王承恩  
提督內外京城召前太監曹化淳等分守諸門丙午賊  
騎薄彰義門太監杜勲縋城上入見大內張皇賊勢語  
守璫輩曰吾黨富貴自在也是夕太監曹化淳開門降  
上死社稷內臣從死者惟王承恩一人

谷應泰曰嘗聞宦者四星在皇位之側而腐身薰  
子動相銜達金貂左璫口含天憲者所由來漸矣  
然秦以趙高敗漢唐以宦侍亡太祖鑒之凡內豎

不令讀書取備掖庭給灑掃而已及乎中葉寵用  
刑餘英憲武熹亂者四世比至懷宗冲齡踐祚睿  
謀天縱手剪凶璫雖李閏有侍安之功曹騰叅建  
桓之策而卒之張達坐收甘露無變不動色而去  
大奸斯已竒矣且其初年江南織造即便撤還塞  
北監軍悉皆免罷仍諭內臣受命始出禁門廷臣  
在官勿交近侍于時嘖笑不假狐鼠無竊宮中府  
中肅清極矣詎意渭水陳兵甘泉舉火而問錢穀




則大僚不對咨廟算則肉食寡謀秦既無人王真  
孤立乃始叅任貂璫徃來給使勞軍轉餉偵刺行  
間蓋亦有所不得已也自是之後曹化淳等以錦  
衣蒙廕而張彛憲總理戶工唐文征親督京營高  
起潛監視錦寧張其鑑盤驗收放內外各司必兼  
貂貴緣邊諸鎮復設中涓語云西頭勢重南衙樞  
機權過宰相良不誣矣其後高弘圖熊開元次第  
投劾倪元璐袁繼咸先後上言侯覽用事而朱穆

發疽朝恩即席而魯公爭坐國體既傷宜士大夫之所鄙也然而英主在御太阿未落非有王振土木之罪汪直西廠之酷劉瑾不軌之謀魏忠賢閹奸之狀而潛窺意旨馴致敗亡者無他陽授以國柄者猶摘龍之珠而陰寄以耳目者直竊叢之神也總之懷宗怒在門戶故必用弘石以發楊賈卒之中常懷宗疑在蒙蔽又必用弘石以發楊賈卒之中常子弟悉合黃巾涼州議郎責輸貨賄而天下事不

可為矣以予論之崇禎初造人望太平假令推誠  
置腹則煬竈可除任賢去邪則小羣可渙與其訶  
之于閹人孰若信之于正士回天獨坐固無事此  
曹也獨奈何輔國就誅元振更用左棺既殺張讓  
復然眉睫之喻乃為識者所悼惜哉



明史紀事本末卷七十四



總校官庶吉士<sub>臣</sub>張能照

校對官編修<sub>臣</sub>楊壽楠

膳錄監生<sub>臣</sub>熊燁

欽定四庫全書叢要

史部

明史紀事本末卷七十五



詳校官員外郎  
臣楊世綸

欽定四庫全書薈要卷八千八百八十七

明史紀事本末卷七十五

浙江提學僉事谷應泰編

中原羣盜

崇禎元年延安饑十一月府谷民王嘉胤倡亂饑民附

之白水盜王二等復合徒衆剽掠蒲城韓城間時承平  
久猝被兵人無固志巡撫陝西都御史胡廷宴庸而耄  
惡聞盜杖各縣報者曰此饑氓徐自定耳于是有司不

以聞盜偵知之益恣劫宜君縣獄北合嘉嶺五六千人聚延慶之黃龍山

二年正月壬戌撫治鄖陽都御史梁應澤以漢南盜告急請兵撫標止步兵三百人陝西巡撫胡廷宴延綏巡撫岳和聲各報洛川淳化三水略陽清水成縣韓城宜君中部石泉宜川綏德葭耀靜寧潼關陽平關金鎖關等處流賊恣掠給事中薛國觀上言賊之熾也由喬應甲撫秦置盜劫不問實釀其禍今弭盜之方在整飭吏

治有先事隄防之法有臨事剪滅之法有後事懲戒之法上是之 巳巳固原逃兵掠涇陽富平執游擊李英

二月陝西兵備商洛道劉應遇率毛兵入漢中合川兵敗賊畧陽守備黃元極擊賊馬蹶被殺猶手刃賊不置賊走漢陰應遇遣兵追斬五百餘誅渠魁數十人餘走蜀其匿漢陰山中者並自殺漢南盜平 三月丙子流盜掠真寧寧州安化三水 四月甲午固原賊犯耀州督糧叅政洪承疇合官兵鄉勇萬餘人圍賊于雲陽



幾覆之賊乘夜雷雨潰圍走淳化入神道嶺 劉應遇

以千人徧漢中賊于五丁峽寧羗知州陳元瓚失防盜  
遁 巡按陝西御史吳煥言秦寇慘掠古所罕有撫臣  
胡廷宴狃于積弛束手無措則舉而委之邊兵至延綏  
撫臣岳和聲諱言邊兵為盜又委之內地總之兩撫欺  
飾釀患致奸民悍卒相煽不已而西安延安諸邑皆被  
盜矣盜發于白水之七月則邊賊少而土賊多今年報  
盜昏騎銳動至七八千人則兩撫之推諉隱諱實釀之

也 十一月京師戒嚴山西巡撫都御史耿如杞以兵入衛譁于涿大掠良鄉如杞逮論死西兵皆沿邊勁卒潰而失次竄走剽掠山東 大盜混天王等掠延川米脂青澗等縣起前總兵杜文煥勦之 三年正月陝西邊盜王子順苗美連逃兵掠綏德衆三四千南圍韓城總督楊鶴巡撫劉廣生提兵赴援斬首三千級賊遁復犯清澗官兵追逐之賊走西川官兵追擊降三百餘人餘大奔苗美叔苗登霧嘯聚于安定總兵杜文煥擊敗

之先是萬厯時朝廷念西軍勞苦預給三月糧以為常

崇禎二年秦大旱粟騰貴軍餉告匱延綏巡撫楊鶴甘肅巡撫梅之煥分道勤王兩軍復以稽餉而詳其潰卒畏捕誅亡命山谷間倡饑民為亂時東事益急廷議核兵餉各邊鎮咸釐汰裁餉至數十萬乘障兵咸譟而下又以給事中劉懋請裁定驛站即給郵乘傳有額毋濫用縣官錢歲省費無筭謂蘇民力也而河北游民向籍食驛糶用是益無賴歲不登無所得食所在潰兵煽之

而全陝無寧土矣 命洪承疇以都御史巡撫延綏

王嘉胤陷府谷他賊入山西犯襄陵吉州太平曲沃

四月賊王子順苗美陷蒲縣山西自河曲至蒲津千五

百里俱鄰陝河最狹賊自神木渡河陷蒲已分三部東

犯趙城洪洞汾霍西掠石樓永和吉隰賊首自號橫天

一字王 五月賊破金鎖關殺都司王廉 六月王嘉

胤陷黃甫川清水二營遂據府谷洪承疇與杜文煥圍

之賊夜劫營官兵擊敗之 延安知府張輦都司艾穆

蹙賊于延川賊求撫王子順張述聖姬三兒等俱降王  
嘉胤等掠延安慶陽城堡多陷總督楊鶴主撫不以聞  
與陝撫劉廣生遣官持牌四出招賊賊魁黃虎小紅狼  
一丈青龍江水掠地虎郝小泉等俱給牒免死安置延  
綏河西但不焚殺其淫掠如故民罹毒益甚有司莫敢  
告而寇患成于此矣 兵科給事中劉懋上言秦之流  
賊非流自他省即延慶之兵丁土賊也邊賊倚土寇為  
鄉導土寇倚邊賊為羽翼六七年來韓蒲被掠其數不

多至近年荒旱頻仍愚民影附流劫涇原富耀之間賊  
勢始大當事以不練之兵勦之不克又議撫之其勦也  
所斬獲皆饑民也而真賊飽掠以去矣其撫也非不稱  
降聚衆無食仍出劫掠名降而實非降也且今年麥苗  
盡枯斗粟金三錢營卒乏食三十餘月即慈母不能保  
其子彼官且柰兵民何哉且邇來貪酷成風民有三金  
不能供納賦之一金至于捕一盜而破十數人之家完  
一贖而傾人百金之產柰何民不驅為盜乎若營兵曠

伍半役于司道半折于武弁所餘老弱既不堪戰又不  
練習當責督撫清汰操練以備實用也 山西流賊破

蒲州潞安官兵敗沒 七月御史黃道直言盜起于饑

請發餉銀易米一從保德州河路一從洛宜陸路賑饑

民庶收拾人心解散黨附不報 八月王嘉胤勾西人

入犯佯乞降仍奪路走黃甫川復引西人入掠洪承疇

杜文煥從孤山進擊大破之賊奔潰 十月王嘉胤陷

清水營殺遊擊李顯宗復陷府谷大盜李老柴于鄜維

間糾三千餘人攻合水寧夏總兵賀虎臣擊賊于盤谷  
斬六百餘級又敗之寧州 十一月山西總兵王國樑  
追賊于河曲發西洋砲砲炸兵自亂賊乘之大潰遂陷  
河曲 十二月乙巳盜神一元破寧塞據之殺叅將陳  
三槐圍靖邊副使李右梓固守賊勾西人四千騎益圍  
靖邊三日夜遂陷柳樹澗保安等城

四年正月神一元陷保安副總兵張應昌擊敗之神一  
元死第一魁領其衆 癸未山西賊犯平陽 庚寅王



嘉肴渡河掠菜園溝副總兵曹文詔擊却之 己亥命

御史吳姓賈金賑陝西饑荒招撫流盜諭曰陝西屢報  
饑荒小民失業甚者迫而從賊自懼鋒刃誰非赤子顛  
連若斯今特發十萬金命御史前去酌彼災處次第賑  
給仍曉諭愚民即或脇從僅入賊黨若肯歸正即為良  
民嘉與維新一體收恤 上召輔臣九卿科道及各省  
監司于文華殿上問山西按察使杜喬林流寇之事對  
曰寇在平陽或在河曲近聞漸已渡河河曲尚阻須大

創之但兵寡餉乏耳上曰前言寇平何尚阻也對曰山  
陝隔河倏去倏來故河曲獨被困問河曲之陷曰賊未  
嘗攻大抵饑民為之內應今不早圖有誤國事上問陝  
西叅政劉嘉遇以流寇對曰流寇因兵餉不足故難勦  
耳且寇見官兵即散退復嘯聚上曰寇亦吾赤子也宜  
招撫之又問近寇所在對曰一在延安一在宜川上凝  
思久之命退 寧武總兵孫顯祖言聞喜稷山賊二十  
餘萬日勦日益官兵不過二千奔逐不支乞發京營或

調邊騎夾勦命下所督便宜專制總督張宗衡以兵餉  
並乏竟不行 二月壬子總兵賀虎臣杜文煥合軍圍  
保安神一魁勾西人千餘騎突圍出復糾賊數萬劫寧  
夏都指揮王英兵潰諸道將棄城南奔戊午一魁至慶  
陽破東關游擊伍維藩擊斬五百餘人 戊辰賊圍慶  
陽總督楊鶴在邠乾不即援宜君賊趙和尚等南犯涇  
陽三原韓城澄城各賊分犯不知其數 壬申神一魁  
陷合水 三月丁丑張應昌等援慶陽賊圍解時議招

一魁散其黨 癸未賊帥孫繼業茹成名等六十餘人  
來降總督楊鶴受之設御座于固原城樓上賊跪拜呼  
萬歲因宣聖諭令設誓各解散或歸伍或歸農自此羣  
盜視總督如兒戲矣 甲午陝盜劉五可天飛據鐵角  
城混天飛獨行狼等聚蘆保嶺衆各萬餘分犯平涼固  
原耀州涇陽三原盜混天猴薄寧州分犯環縣 賊陷  
武安走平涼詐稱官兵襲陷華亭時大盜王老虎圍莊  
浪曹文詔王性善西勦諸賊乘虛四犯 楊鶴給降人

牒令各還鄉簡其豪千餘人以叅將吳宏器領之駐寧  
塞而宜君維川盜又蠶起矣副總兵曹文詔擊賊于  
栗園大敗之四月己未神一魁降于楊鶴鶴責數其  
罪俱伏謝一魁有戰騎五千鶴侈其事上言乞賜一二  
萬金賑濟又止巡撫練國事北征宜雒賊亦求撫于國  
事從之其脇從饑民各給牒回籍首領置軍中省臣  
劾宣大總督魏雲中陝西總督楊鶴恒怯玩寇上切責  
雲中等平盜自贖時言官交論鶴鶴疏引咎曹文詔

等克河曲斬賊一千五百餘級獲兵械馬騾數千丁

卯延綏巡撫洪承疇令守備賀人龍勞降者酒降者入  
謝伏兵斬三百二十人 庚午賊陷始興 御史吳姓

西行至延長寇聚城下諭以禍福委同知趙鶴年分賑  
賊各解散游賊聞之皆回受賑撫賊七千有奇 降盜

不沾泥擁衆脇糧賞復攻米脂總兵王承恩侯拱極率  
三千人至葭州洪承疇張應昌亦至賊分兩營以待連  
戰賊始遁追至西川斬三百餘級賊溺死無算官兵屯

西川雙湖峪其間窰寨六十有四皆險絕盡為賊藪承  
疇乃令在在設防堵截不沾泥愬率百騎逃關山嶺都  
司馬科等追之盡殲其騎不沾泥乃降手殺賊目雙翅  
虎縛獻柴金龍以自贖 五月乙亥王承愬擊宜川賊  
敗之賊闖王虎金翅鵬乞降金翅鵬即王子順姪成功  
也餘賊走宜君其衆二萬 陝西都司曹變蛟追寧塞  
遺賊于唐毛山賊大潰四戰皆捷先後斬一千四百餘  
級而寧塞之逸賊稍殺矣 御史吳甡至榆林鎮以晉

兵過糴斗米銀六錢草根木皮俱盡人至相食姓因奏  
榆林為西北雄鎮宿將勁兵出焉非他鎮比雜販牟利  
商民欣赴初無損于晉若以防河為名而絕秦人之命  
恐謀國不在此也 延安賊趙四兒以萬餘人掠韓城

邵陽靈州叅將張全昌以五百人戰三日斬三百餘級  
賊走鄜州復進擊斬六百餘級時榆林連旱四年延安  
饑民甚衆西安大旱巡撫練國事更請發帑賑濟不報  
趙四兒尋降 初洪承疇撫盜王子順等駐榆林巡按



御史李應期誅之上謂賊勢獷甚招撫為非殺之良是

命吳姓覈奏 丁酉延綏榆林大雨始有禾 庚子盜

滿天星降于楊鶴鶴選其驍勇置營中散其黨萬二千

人即命其魁分勒回籍未數月皆畔去 壬寅賊萬人

自合水保安逃出攻中部降丁內應城陷 六月癸卯

曹文詔擊斬王嘉胤于陽城其黨復推王自用為首號

曰紫金梁其黨自相名目有老回回八金剛闖王闖將

八大王掃地王闖塌天破甲錐邢紅狼亂世王混天王

顯道神鄉里人活地草等分為三十六營 辛酉鄜州  
賊混天猴張孟金謀襲靖邊張應昌邀之于真水川敗  
之追斬四百餘級癸亥混天猴獨行狼等萬餘人自甘  
泉犯合水洪承疇率兵追擊敗之甘泉山中混天猴等  
乞降 七月賊首上天龍馬老虎獨行狼復掠鄜州列  
三營于太平原楊鶴王承恩擊破之上天龍等以二千  
人降給事中孟國祥曹履泰各奏撫賊欺飾之弊 癸  
未逮總督陝西三邊都御史楊鶴下刑部獄論戍之

丁亥曹文詔等諸將擊賊連敗之賊奔東北是役也合  
督撫四鎮之兵窮追半月先後數十戰賊敗潛遁山谷  
延安慶陽千里內暫安焉 甲午賊趙四兒六千餘人  
東渡山西總督洪承疇等兵從之賊入沁水縣縣東北  
有竇莊故張忠烈公銓里居也先是銓父尚書五典謂  
海內將亂築塙為堡甚堅至是賊犯竇莊五典已沒銓  
子道濬道澤俱官京師惟銓妻霍氏守舍衆議棄堡去  
霍氏語其少子道澄曰避賊而出家不保出而遇賊身

更不免等死耳死于家不猶愈死于野乎且我守堅賊必不得志躬率僮僕為守禦賊至環攻之堡中矢石竝發賊傷甚衆越四日乃退其避山谷者多遇賊淫殺惟張氏宗族得全冀北兵備王肇生表其堡曰夫人城

辛丑陝西賊陷中部王承恩擊斬千七百級 八月癸

卯總兵賀虎臣擊斬慶陽賊劉六斬其餘黨五百餘人

西路漸平 先是巡按陝西御史李應期言秦賊旋撫旋叛上命御史吳銜確查報聞銜上言延慶地亘數千

里土瘠民窮連歲旱荒盜賊蜂起西路則神一元破寧  
塞安邊攻保安一元死第一魁繼之又破合水圍慶陽  
總督楊鶴招撫四千有奇餘黨郝臨菴劉六等衆不下  
數萬掠環縣真寧間此保安合水之流孽也延安四載  
奇荒邊軍始亂出掠米脂綏德青澗脇從甚衆幾于無  
民流劫延南點燈子衆號數萬自山西回黃龍山西安  
北界數州縣被毒甚慘此延北邊賊流毒西安者也近  
官軍南剿賊望風潛逃相繼招安滿天星等降于榆林

餘賊遂徙而北其降賊雖散原籍仍復剗掠于是有官賊之謠而人致恨于招撫之失事矣點燈子衆五六千在青澗旋撫旋叛慶陽郝臨菴劉六等亦曾受撫今攻陷中部者皆其衆也又降賊獨頭虎見大兵之來已出韓城潼關道臣胡其俊猶追贖錢九十萬賊復橫索一給之惟謹要挾重資之說有自來矣為今之計集兵合剿殲其渠而餘衆自破明賞罰而士氣自鼓秦事猶可為也

山西賊陷隰州蒲州命許鼎臣巡撫山西

洪承疇駐慶陽報乏餉已承疇兵大敗趙四兒于山西

桑落鎮 九月山西賊入河北犯濟源 神一魁復叛

據寧塞刼守將吳宏器范禮官兵攻圍之其黨黃友才

斬一魁以獻 盜獨頭虎滿天星一丈青上天猴等五

部恣掠宜維副總兵趙大肩在韓城去賊營二十里不

敢出戰土人強之出報斬五十級驗之則率婦女首也

給事中魏呈潤劾大肩落職 壬辰命洪承疇總督陝

西三邊張福臻巡撫延綏 黃友才復叛而遁追斬千

一百級 洪承疇擊賊趙四兒擒之即點燈子也起青  
澗綏德奔突延西間往來秦晉沿河郡縣多苦之至是  
伏誅平陽稍安其黨黑煞神起又有過天星蝎子塊與  
紫金梁等共數十部自賊據中部官軍攻圍兩月不下  
冬十月曹文詔及張福臻兵俱至克之 陝西賊陷宜  
川 十一月丙子陝賊譚雄陷安塞襲掠一空仍乞撫  
閏十一月王承恩誘譚雄等五人斬之 癸丑陝賊不  
沾泥張存孟等陷安定甲子王承恩克安塞斬五百餘



級即進勦安定賊潛走綏德 降丁混天猴勾盜陷甘

泉刳餉銀十萬八千兩殺知縣郭永圖備兵河西張允  
登戰死洪承疇聞之遣王承恩分勦以甘泉廊延咽喉  
而自以四百人赴之賊勢日熾承疇日不暇給矣 寧

武總兵孫顯祖敗賊蝎子塊于萬泉 十二月甘泉賊

陷宜君又陷葭州備兵僉事郭景嵩死之 己丑諸降

盜復叛攻綏德 上憂延綏賊蔓以山陝督撫請餉疏

切責戶兵二部兵部尚書熊明遇請措二十萬金接濟

秦中 甲午孫顯祖于河津聞喜等處與賊六戰俱捷  
五年正月延綏賊偽為米商入宜君遂陷之復陷保安  
合水流入山西者陷蒲州永寧大掠四出山西巡按御  
史羅世錦歸咎于秦謂以隣為壑給事中裴君賜晉人  
也上言責成秦之撫鎮驅之回秦而後再議勦撫蓋當  
事之無定見如此 洪承疇請留陝西餉銀二十萬資  
勦費并以勸農從之 先是寧塞逸賊合環慶諸寇屯  
鎮原之蒲河欲犯平涼走鳳翔漢中陝撫練國事檄固

原備兵王振奇同副總兵王性善等截守各隘口檄平涼兵備徐如翰同副總兵董志義守涇州各要害又檄總兵楊嘉謨等緝奸殺賊塘馬斷其耳目賊遂不敢出又食乏互相猜疑洪承疇從鄜州間道疾至慶陽曹文詔以臨洮兵至賀虎臣兵亦至會于西澳各夾擊賊大小十餘戰追犇數十里斬首千餘級傷墜無算而寧塞之寇盡矣惟混天猴等尚據襄樂練國事遂移鎮寧州時以西澳之捷為用兵來第一 戊午洪承疇等擊敗

賊于槐安堡賊雖奔竄尚破華亭擾莊浪而官兵追捕  
皆破膽潛匿先是延西諸寇承疇偕文詔先後清蕩而  
鐵角城乃邊盜藪郝臨庵可天飛為官軍所敗獨行狼  
跳入其伍耕牧鐵角城為持久計聞他盜盡平甚懼承  
疇文詔擊破之斬可天飛其二賊亦生得就誅自西澳  
捷後軍聲大振曹文詔忠勇善戰承疇與下同甘苦得  
士卒心轉戰四載斬級三萬西人稍稍休息然亦憊甚  
矣 甲子陝西原任通政使馬鳴世奏曰三秦為海內

上游延安慶陽為關中藩屏榆林又為延慶藩籬無榆林必無延慶無延慶必無關中矣乃自盜發以來破城屠野四載于茲良以盜衆我寡盜飽我饑內鮮及時之餉外乏應手之援揆厥所由緣廟堂之上以延慶眎延慶未嘗以全秦眎延慶以秦眎秦未嘗以天下安危眎秦而且誤視此流盜為饑民勢焰燎原莫可撲滅若非亟增大兵措大餉為一勞永逸之計恐官軍騫于東賊馳于西師老財匱揭竿莫禦天下事尚忍言哉乞勅所

司亟措餉二十萬給民牛種為兵士犒賞急圖安戢庶  
全秦安而各鎮安矣 張應昌等擊黃友才斬之 二  
月寧塞逋寇復熾 庚寅盜夜入鄜州備兵僉事郭應  
響死之 三月壬戌陝西賊陷華亭知縣徐兆麟赴任  
七日城陷逮至竟坐棄市人皆寃之 四月湖廣流盜  
自興國入江西秦和吉安等處 七月山西賊陷大寧  
八月曹文詔擊賊甘泉敗之洪承疇令脇從者免殺  
降四千餘人散者亦數千人餘賊散匿山谷 山西巡

撫宋統殷擊賊于長子賊奔沁水庚辰賊首紫金梁老  
回回八金剛以三萬衆圍寶莊時張道濬得罪家居率  
其族禦之賊多死聞秦師且至懼欲乞撫紫金梁呼于  
壁下道濬登俾見之紫金梁免胄前曰我王自用也誤  
從王嘉肩故至此此來乞降耳俄老回回亦至道濬諭  
之曰急還所俘散若徒衆吾為請于撫軍貸爾死賊乃  
還所掠拔營而西入陽城界道濬以賊情告于統殷曰  
賊狡未可信因遣使往覘賊諸賊成就約惟八大王闖

塌天五營不受命紫金梁歸欵未決諸軍乘賊不備輕  
騎襲賊營賊怒南犯濟源陷溫縣 九月山西賊破臨  
縣賊魁豹五等據其城又陷脩武殺知縣劉鳳翔焚掠  
武陟輝縣遂圍懷慶上以藩封重地切責河南巡撫樊  
尚燝殺賊自贖賊既盡嚮河北山西巡撫宋統殷備兵  
冀北王肇生率軍次陵川扼賊北歸賊北走遇官軍賊  
死鬪互相勝負會夜與賊爭險對營兩山頭賊緣窮谷  
而登大譟官軍亂統殷肇生皆走與諸軍相失宣大總



督張宗衡將兵至高平統殷肇生以師畢會大破賊于

桑子鎮賊復入沁水 十月詔副總兵左良玉將兵二

千五百人援懷慶 癸未王承恩敗安塞遺賊于西川

胡堡賊目喬六自斬其魁以黨降餘遁延綏稍寧 十

一月罷山西巡撫宋統殷以許鼎臣代之 十二月張

宗衡許鼎臣同逐賊臨縣賊轉入盤磨山山方六百里

賊閻正虎據交城文水以窺太原邢滿川上天龍據吳

城向陽以窺汾州紫金梁以秦豫毛兵俱集澤潞東南

遂乘虛從沁州而北入榆次又入壽陽距太原不五十里許鼎臣撤師北歸時賊首亂世王與紫金梁爭一掠婦搆小隙遣其弟混天王來歸廷議方督進討諸將諱言受降權辭謝之約得紫金梁頭始為請于朝混天王唯唯泣涕而去亂世王與破甲錐合謀圖紫金梁賊分為三陷霍垣曲長子諸縣壬辰陷遼州是日除夕也

是月趙和尚等賊斬其魁霍維端以降諸將分領八營還宜君

六年正月丁酉賊闌入畿南西山距順德百里時大隊  
在山西分為二一北向西犯平縣窺固關一南向河北  
懷衛之間盡遭蹂躪矣 丁未左良玉敗賊于涉縣西  
斬其渠賊望其旗幟皆靡然賊勢尚熾謀渡河南犯

癸丑進曹文詔都督同知文詔連敗賊于忻代間斬首  
千五百級 二月許鼎臣曹文詔屯平定張應昌屯汾  
州駐太原東西以禦寇 賊踞林縣山中饑民相望而  
起左良玉敗績于武安河南兵七千先後死亡殆盡賊

益熾左良玉勢孤乃請鄧玘兵相援備兵井陘副使寇  
從化檄守備李定王國璽逐賊畿輔陷賊伏中兵敗死  
亡畧盡賊長驅保定備兵副使盧象昇禦卻之 曹文  
詔敗賊于榆杜時文詔屢捷張應昌逗遛不進紫金梁  
老回回從榆次敗北奔 三月蜀賊寇百丈關官軍敗  
沒 詔總兵鄧玘將川兵二千益以石砮土司馬鳳儀  
兵馳赴河南未幾馬鳳儀敗沒 丙午山西兵擊賊于  
陽城北張道濬設伏于三纏凹賊至伏起擊之斬其魁

生擒賊首滿天星闖王賊大奔巡撫鼎臣獻俘闕下奏  
道濟功第一 四月丙寅山西賊陷平順 乙酉曹文  
詔敗賊于陽城斬千餘級 河南西路賊自輝縣入清  
化鎮所在守將敗沒部臣以河南不塞太行之險揖賊  
使入撫臣不得無罪 五月癸巳山西巡撫鼎臣以流  
寇恣掠請蠲積逋并豫免數年額賦不許 己酉上以  
勦賊諸將一時功罪勤惰應有監紀特命內監陳大金  
閻思印謝文舉孫茂霖分監曹文詔張應昌左良玉鄧

玘軍紀功過催糧餉仍發內帑四萬金素紅蟒段四百匹紅素千匹軍前給賞 庚申曹文詔夜襲賊于偏店賊亡走墜山谷者亡算盡南奔諸將會兵逐之沙河奪馬騾數千賊自邯鄲南走 河北賊陷涉縣 六月乙丑川兵潰于林縣毛兵殺傷甚衆潞王告急乞濟師 丙寅河北賊圍湯陰林輝涉安諸邑別賊自陽城垣曲來合于濟源 山西賊陷和順 辛巳左良玉破賊于懷慶賊盡奔太行山 上念中州寇盜蔓延命總兵倪

寵王樸分將京營兵監以內監楊進朝盧九德賜二帥  
弓矢千五百戰馬三百健丁三百馳赴中州夾勦 七  
月乙未賊屯彰德汾州張應昌進勦汾陽知縣費甲鏢  
以逼迫苦供億投井死 丙申山西賊陷樂平 河北  
賊攻彰德左良玉禦却之 辛丑山西賊陷永和旋陷  
沁水賊自秦入晉五犯沁水至是陷之 八月丁亥陝  
西賊攻隆德殺知縣費考芳分守固原叅政陸夢龍戰  
于綏德城下死之 九月己亥張應昌敗賊于平山獲

賊首張有義即一盞燈也 十月丁卯山西河北諸賊

二十四營乘冰渡河而南犯閩鄉陷澠池分入河南湖

廣漢中興平 畿內賊至寧晉掠南宮甚慘尋走五臺

山山周數百里賊據顯通寺其中新儲皆具險阻足守

官軍不敢擊 十二月己未河南賊陷伊陽庚申陷盧

氏徧掠汝州浙川內鄉光化均州戊寅犯南陽 庚辰

湖廣賊假進香客陷鄖西 癸未湖廣賊陷上津丙戌

陝賊陷鎮安 時秦賊既盡入晉流突畿輔河南至數



十萬而延綏賊首鑽天哨開山斧獨據永寧關前阻山險下臨黃河負固數年不下延綏巡撫陳奇瑜謀取之乃陽傳總制檄發兵簡衆七千人抵延川潛師疾走入山賊不虞大兵至倉皇潰佚焚其巢縱擊斬首千六百級二賊死分兵擊賊首一座城斬之延水盜悉平奇瑜威名著關陝 是年陝西山西大饑

七年正月壬辰降盜王劉王之臣通天柱等至太原挾賞巡撫戴君恩設宴誘劉等斬之共斬四百二十九人

王之臣即豹五通天柱孝義土賊也而嵐竒大盜高加  
計號顯道神尤橫會大旱饑民投賊者逾衆畿輔兵  
漸集賊西竄河南賊自鄖陽渡江薄穀城掠光化新  
野而襄陽賊六路俱集郡兵不能支又賊四五百人入  
郢界圍均州往荆門西北夷陵辛丑陝賊陷洵陽逼  
興安西鄉土寇乘之漢中震動興安賊連陷紫陽平利  
白河道臣王在臺固守興安洪承疇赴援城得全時練  
國事移兵商維賊南破鳳縣入四川癸丑陷遷安乙

卯楚賊陷房縣保康 南京兵部尚書呂維祺奏言南

都鳳泗承天陵寢所在宜以宿壽襄葉為咽喉淮徐則

京師咽喉也乞勅淮撫楊一鵬急宜預備防賊東犯

二月壬戌蜀賊陷興山壬申入瞿塘陷夔州一宿去

賊既蔓延秦晉楚豫之郊流突無定廷議以為各鎮撫

事權不一互相觀望宜以重臣開督府統攝諸道兵討

賊制曰可僉擬洪承疇因陝西三邊所恃未可輕易詔

進延綏巡撫陳奇瑜兵部右侍郎總督陝西山西河南

湖廣四川軍務眎賊所向隨方勦撫竒瑜檄諸將會兵于陝州 三月己丑南京右都御史唐世濟上言流寇有四一亂民一驛卒一饑黎一難氓宜分別勦撫上善之下總督竒瑜 乙巳川兵敗賊于巴州 山西自去秋八月至是不雨大饑人相食 四月丙辰逮撫治鄖陽蔣允儀以失陷鄖西諸邑也 川賊渡利州河扎陽平白水等關分四路土人力拒之賊走奉節 楚賊在房縣婦倍于男總兵張全昌連擊敗之 甲戌發帑金

五萬命御史梁炳賑饑陝西時山西永寧州民蘇倚哥  
殺父母炙而食之 川賊三萬人返屯鄖陽之黃龍灘  
分三道一均州趨河南一鄖陽趨浙川一趨商洛盧氏  
張應昌兵敗于均州 丁丑川賊復入陝陷兩當己卯  
陷鳳縣先是三邊總督洪承疇因插漢犯甘肅即漢中  
北行至棧道青橋驛聞州賊數萬營寧羌乃返至沔州  
援之賊由陽平關過河奔鞏昌承疇追至成縣見賊勢  
盛須益邊兵乃檄副將賀人龍劉成功等兵三千赴藍

田夾擊及兩當鳳縣連陷賊分道一向邊方一向漢中  
知府斷棧道守雞頭岡賊不得前間道犯城固洋縣官  
兵禦郤之賊走石泉漢陰又別部賊二萬由鳳縣趨寶  
鷄汧陽求撫承疇姑慰諭焉時撫治鄖陽盧象昇總督  
陳竒瑜以數省兵力萃于楚楚賊盡西奔漢中而川巴  
通江入西鄉者復二三千凡名賊盡歸漢中興平而接  
于商雒癸未賊復謀入川阻大江入西安之終南五月  
陝別賊陷文縣文縣去歲大旱入秋早霜冬無雪今春

不雨斗米銀七錢延綏西路數年不登賊分部一畧鄜  
延一掠延慶官軍迫之賊皆傍終南山竄入商維羣盜  
畢集深入大峪承疇會師進逐之遂東走網峪川復入  
大山遠竄 己亥賊復出再陷鳳縣漢南招撫之賊一  
出棧道西陷麟游永壽東陷同安庚子賊走鳳翔西趨  
汧陽隴州 乙巳洪承疇自漢中西援甘肅 巡撫陝  
西練國事奏今日最難有五曰缺兵大盜起延綏榆林  
兵不足轉調甘肅自寧夏甘肅再喪師今防插漢尚不

足能分以勦賊乎榆林兵止五千陳竒瑜率以勦賊而防秋又當西還則兵愈少二曰缺餉西安鳳翔兵荒所留新餉即使支盡不抵三鎮之用司府無可借餉將安出三曰缺官荒盜頻仍有叅罰戴罪有追贓客死有失城就逮道府且不樂就何況有司今官缺三十餘員何以治民辦賊故缺官宜急補而叅罰亦宜少減也曰宗祿秦俗囂悍貧宗尤甚垂涎賑金漸不可長曰驛地秦晉驛遞例不全給今募夫之苦更加十倍故人人思遁



凡在衝路宜全給以安其心 洪承疇進師岐山駐三

原賊十餘萬承疇兵僅三千張疑設伏賊從耀州奔同  
州時漢中兵三千四百有奇總兵左光先等將之臨鞏  
兵三千五百總兵孫顯祖等將之平涼兵千人副總兵  
艾萬年將之止可城守總兵張全昌等兵六千專眎盜  
所向為援勦 六月丙寅總督竒瑜鄖撫象昇勦竹山  
竹谿各山寇連戰斬一千七百餘級竒瑜復敗賊于硤  
石斬七百餘人渰死五千餘人墮崖死者二千餘人

七月陝西降盜陷隴州 己丑洪承疇奏言入陝猖獗  
之賊大抵可十四五萬明知官軍一二萬不能四馳恃  
其勢衆旁伏遞進則勦賊之難賊多精騎每跨雙馬官  
軍馬三步七則追逐之難賊攻堡掠野到處可資官軍  
待餉轉運則糧芻之難賊入山負嶮官兵相持一日即  
坐誤一日則時日之難且請鹽課銀三十萬加曹變蛟  
秩鼓其敵愾從之 辛卯賊至鳳翔西關藉口奉督撫  
檄安插城內守臣知其詐給以門不敢啟須縋城上先

登三十六人盡殺之總督陳奇瑜因借為辭劾地方官  
紳撓債撫局以激上怒命緹騎逮寶鷄知縣李嘉彥及  
鳳翔鄉紳孫鵬等五十餘人下刑部獄 叛兵楊國棟  
擁三千騎披雙鎧直抵西安城下乞撫巡按范復粹無  
計登陴固守巡撫練國事在鄠縣聞之馳還登南城檄  
賊至濠畔語一日夜未決度不受撫必西走鄠整屋密  
檄沿途官兵飭備更設伏整屋之夾水溝時禾茂泥淖  
騎不任馳伏發殲其半國事遣官招之諭殺渠自贖子

上賞項之一賊斬國棟以獻賊人人自疑互戕千餘人  
餘仍入南山 乙未洪承疇進次華州各賊聞之自朝  
邑折而北奔澄城郃陽 賊混世王等從鳳翔東奔云  
犯西安洪承疇馳一日夜入西安檄諸路兵赴西安合  
擊賊賊颺至西安東境官軍以力疲未能出承疇恐賊  
東出潼關先令張全昌曹變蛟間道走渭華遏其前而  
自率兵至潼關紅鄉溝追賊游擊李效祖拓永鎮力戰  
賊卻不能出關因登山承疇馳赴藍田欲從山後間道

勦之丙午賊覘知官兵意夜走商雒初老回回等萬餘  
先踞商雒山中今又益盜萬餘其地山谷險阻承疇率  
諸將共兵三千人赴潼關大峪口截其出仍備閩鄉靈  
寶諸處 總兵尤世威兵潰于雒南羣賊越盧氏犇永  
寧先是守隘諸兵露宿凡三月皆致疫痢不任戰左良  
玉兵自內鄉赴援盧氏 慶陽賊南下烽火徹三原涇  
陽耀州富平 八月上憂寇詔發各鎮兵四萬五千竝  
赴河南時豫賊衝突禹許長葛間凡十三營大營在永

寧盧氏約九月向山東誘官軍東出謀襲汴梁 陝賊復陷隴州屯州城浹月叅將賀人龍等援隴州賊圍之羣賊到處烏合簡精壯為前驅收婦女老弱急則用之餌官軍故諸臣動稱斬馘報捷賊勢不減 總督竒瑜報降賊一萬三千有奇斬渠十人餘俱延安民竝令還鄉先是賊為洪承疇所逐竄漢中川兵扼巴西諸險賊饑無所得食故乞降于竒瑜凡數萬人竒瑜專事招撫受其降檄諸軍按甲無動遣官監護降者諸盜未大創

本無降意徒以饑疲困于地險不得逞姑從款以紓我  
師竒瑜檄所過郡邑為具糗糧傳送之既度棧道已出  
險數萬衆漸不受繩束仍事殺掠所至罷市賊遂盡殺  
監護官五十員攻陷麟游永壽勢不可遏矣 賊先鋒  
高傑降于賀人龍人龍率以襲賊卻之 閏八月乙酉  
陝賊陷靈臺辛卯陷崇信白水丙辰陷涇州 河南大  
旱 壬寅陳竒瑜至鳳縣時賊益熾北接慶陽西至鞏  
昌西北至邠州長安西南則盤屋寶鷄衆殆二十萬始

悔其見愚分兵出禦而兵已寡矣 九月賊二十餘營

西至函谷關東至河陽連屯百餘里別賊萬餘連營雒

南閩鄉 癸亥陝賊陷扶風 庚午命吳甡巡撫山西

甲戌豫賊東至于蘄水大隊盡入黃州廣濟 兵部

檄河南兵入同華湖廣兵入商雒四川兵入漢中興平

山西兵入韓城蒲州 丁丑陝賊分三部一由鳳縣攻

漢中一出略陽由陽平關入梓潼劍州犯蜀一由寧羌

犯廣元 辛巳洪承疇遣副總兵左光先等援隴州賀



人龍圍始解 十月甲寅陝西巡按傅永淳上言漢南

降盜陷城破邑所在騷然皆由竒瑜端主招降謂盜已  
革心不許道途訊詰故郡邑不敢問開門揖盜勦撫兩  
妨皆竒瑜之流毒也山西巡撫吳甡言招安流盜最宜  
慎重彼狼子野心勢難馴服况邊地窮荒蕪居無食僅  
曰免死遂甘心易慮乎哉 癸巳河南盜掃地王等趨  
江北自英霍分掠潛山太湖宿松別部陷陳州靈寶  
已酉楚賊自京山間道趨顯陵明日遁入山中時大寇

仍聚秦中老回回屯武功 辛亥河南賊陷盧氏 上  
以秦寇猖獗壬子逮巡撫練國事命李喬巡撫陝西  
官軍三敗賊于華陰南原之間斬首千二百級 十一  
月總督竒瑜請各撫鎮分地責成從之時撫局大潰賊  
氛日熾故有是請欲分委其過也 壬戌江北賊陷英  
山焚霍山 庚辰削總督陳竒瑜職聽勘 十二月進  
洪承疇兵部尚書總督河南山西陝西湖廣保定真定  
等處軍務其總督三邊如故先是西寧殺將領承疇還

軍定亂賊遂分陷關隴西寧既定承疇自甘肅旋師東  
行賊聞承疇將至悉衆東奔分道盡入河南集宛雒間  
左良玉軍澠池總兵陳永福合鄧玘軍南陽頗有斬獲  
而山西防河之戍多逃自靈邱廣昌徑走五臺陝西鄆  
陽各處告警賊游兵東下常德

八年正月丁巳河南賊陷滎陽屠汜水又陷固始時秦  
賊數十萬出關分為三一自陝州上平陽入晉一自武  
關嚮襄陽入楚一自盧氏東向分犯河南北河南北諸

盜復分為三一走伊汝陷滎汜焚掠無遺東剽及鄭州  
復分道犯商雒一自葉蔡南圍汝寧一自懷慶東渡河  
掠歸德睢汝陳許等州其襄陽賊與汝寧合十五營衆  
數十萬並入襄陽境給事中常自裕上言中原天下安  
危所係今羣盜充斥乃僅以左良玉一旅塞新澗陳治  
邦等數營扼汝州陳永福孤軍堵南陽賊勢日衆兵力  
日分賊二三十萬大小七十二營蜂屯伊嵩宛維之間  
以數千官軍東西堵拒賊何所畏而不長驅哉乞更選

邊兵統以廉勇之將特選重臣視師庶腹心不致決裂

也 河南逸賊復入漢中陷寧羌轉入臨鞏 庚申江

北賊陷霍邱 兵部議調西北邊兵及南兵共七萬二

千餉九十三萬六千并發內庫銀二十萬齊赴督臣軍

前更命尚書承疇統率大兵出關節制諸路撫鎮合力

勦除期以六月掃蕩廓清立頒上賞如仍留餘孽督撫

諸臣立賞重典其進止一聽督臣概不中制承疇率軍

赴河南 陝西賊陷靈臺 河南賊分三道一趨六安

一趨鳳陽一趨潁亳 壬戌陷潁州知州尹夢鰲通判

趙士寬俱闔室死之 丙寅賊陷鳳陽鳳陽無城郭賊

大至官軍無一人迎敵者遂潰賊焚皇陵樓殿為燼燔

松三十萬株殺守陵太監六十餘人縱高牆罪宗百餘

人留守朱國相巷戰斬賊二十七人力竭死賊渠掃地王太

平王入府治知府顏容暄囚服匿獄中賊縱囚獲之賊

渠張蓋鼓吹坐堂上杖容暄于堂下殺之推官萬文英

等六人武官四十一人俱死士民被殺者數萬剖孕婦

注嬰兒于梨燔公私邸舍二萬二千六百五十餘間光  
燭百里賊渠列幟自稱古元真龍皇帝恣掠三日戊辰  
太監盧九德總兵楊御蕃以川兵三千救鳳陽南京兵  
亦至賊奔以筵蓐卜于神祠不利剗神像而去賊拔營  
南下沿途殺掠無遺趨廬州 丁卯命洪承疇趣東馳  
勦寇 甲戌鳳陽賊陷巢縣已攻舒城知縣章可試塞  
三門開西門誘賊入陷于坑奔潰死千人因掠霍山合  
肥諸縣是日圍六合聚穉子百十環木焚之聽其哀號

以為笑樂又裸婦人數千詈于城下少有媿阻即磔之  
攻三日而去 出帑金二十萬助勦餉發太僕金十萬  
輸西安其湖廣餉十九萬資鎮寧等兵鹽課十萬貯淮  
揚以防寇逸初兵部會戶部調南北主客兵七萬馬一  
萬五千每兵日銀三分米一升五合馬日草一束銀二  
分豆三升銀二分計五閱月約十一萬金云 戊寅江  
北賊自舒城抵廬江邑人具幣求免偽許之夜襲城城  
陷已卯陷無為州 洪承疇抵河南河南諸盜知承疇



至又入潼關承疇遣副總兵來脣昌以千二百人往戍

西安令總兵秦翼明游來朝間道向山東趨徐州捍江

北逸寇 庚辰江北賊滿天星張大受等攻桐城不利

賊渠乘輿繞城呼降守將射中其腰夜走潛太諸邑諸

邑多山氓習獵射虎豹藥弩窩弓甚設所在結寨殺賊

賊遂西向麻城抵漢口 二月癸未江北賊陷潛山乙

酉陷羅田 命總兵曹文詔勦寇陳許時湖廣扼賊賊

仍走太湖攻陷之而河南賊迫于諸路兵其在南陽者

過應隨駐棗陽在汝寧者則入黃州而鳳潁賊入英霍  
蕪黃一帶擾殆遍其在嵩盧靈陝諸寇密邇潼關維南  
者又折入秦中約六七萬西安諸縣並遭蹂躪有四大  
營北渡渭突剽邠耀間其山西寇則在平陽汾州諸縣  
並野掠而土寇助之 癸未巡按鳳陽御史吳振纓始  
以皇陵之變疏聞是日上當御經筵特傳免素服避殿  
親祭告太廟命百官修省俱素服從事逮巡撫鳳陽都  
御史楊一鵬并振纓下獄一鵬論死棄西市振纓遣戍

乙未命侍郎朱大典總督漕運巡撫鳳陽同洪承疇

協勦承疇請四川撫鎮俱移夔門達州進援襄漢湖廣

撫鎮分駐承天襄陽鄖撫移駐鄖襄漕督移駐潁亳進

援汝寧歸德山東撫臣移鎮曹濮進援江北江南山西

撫臣移蒲州進援靈陝陝西撫臣移商州調度興安漢

中河南撫臣移汝南南陽間保定撫鎮移駐邯鄲磁州

可南北策應從之 三月癸丑湖廣賊陷麻城 丙辰

省臣乞蠲陝西八年以上逋租不許 庚申蕪黃大盜

爬天王擁衆八百餘人村民擒之身長八尺自言天亡  
我非我罪也倡亂十二年陷十州縣其子曰啖人心髮  
雙目俱赤 先是鳳陽賊犇蘄黃洪承疇次汝寧慮其  
再入江北令鄧玘扼之令曹文詔邀之應隨間又總兵  
賀人龍劉成功率兵分駐信陽泌陽恐其入豫也 壬  
戌漢中賊陷寧羌 丙子總兵鄧玘為叛卒殺于樊城  
玘無紀律所將蜀兵好淫掠俄騎營畔玘避樓墜火死  
舉營北竄惟步卒未動洪承疇命副總兵賈一選周繼

元分領之。是月給事中常自裕言：「皇上赫然震怒，調兵七萬，其實不過五萬，且分之各處未足，過賊鳳陽，焚劫四日而馬爨至，歸德圍解三日而鄧玘來，潁毫安廬之賊逆旆而北，尤世威等信尚杳然，至賀人龍等各處淫掠，所謂賊梳而軍櫛也。唯皇上嚴飭之以伸軍法。」四月乙酉，承疇次汝州，以各寇之復入秦也，率諸將自汝入秦，檄曹文詔以師會。丙午，承疇次靈寶，文詔自南陽至，以商雒為賊藪，漢中興平其寄境也，令文詔出閩。

鄉直擣商雒自馳興安過其犇軼 五月甲寅曹文詔

夜至五峪寇伏險以誘文詔擊敗之張全昌自咸陽出  
興平之東老回回等拒官兵營五十里賀人龍南入子  
午谷奪其南徑劉成功及游擊王永祥往東南過其北  
走夜渡河走郿縣承疇亦渡河追之丙辰至王渠鎮寇  
方下南山恣掠賀人龍遽擊走之追至大泥峪寇舍騎  
登山丁巳官兵至郿縣之秦王嶺值寇張全昌擊敗之  
自是商雒之寇迹終南山中餘寇西奔興平蓋冬春之

間寇奔豫奔楚奔江北其勢多而且散至是寇又悉萃于秦矣 六月壬午下河南巡撫元默于獄丁酉免陝西巡撫李喬官議罪以庸懦玩寇也以甘學濶巡撫陝西 乙酉秦賊搖天動襲陷西和 丙午總兵曹文詔至娑羅寨寇大至力竭自刎文詔敢鬪前後殺賊萬計為賊所畏官軍聞之奪氣 秦賊在晉者巡撫吳姓會兵逐之走河南惟顯道神活地草鄉里人三營留晉姓方謀合兵勦滅會西人入塞斂兵防河賊復熾 七月

癸亥秦賊陷澄城 八月壬午陷咸陽 丁酉商維寇

復入河南犯盧氏 癸卯命湖廣巡撫盧象昇總理直

隸河南山東四川等處軍務統關遼兵賜尚方劍便宜  
行事肅制中原洪承疇勦寇西北象昇勦寇東南如寇  
入秦象昇進兵合擊 十月壬辰老回回襲陷陝州

乙巳上下詔罪已避居武英殿減膳徹樂除典禮外惟  
以青衣從事以示與行間文武士卒甘苦相同之意

先是賊翻山鷄降于承疇賊首闖王退屯乾州承疇令



降賊翻山鷄說之不聽南走武功承疇追擊敗之闖王

率大隊自藍屋武功分道渡河十一月辛酉河南賊

焚關廂而西老回回犯南鄧秦賊一字王等部衆二

十萬撞天王統十七萬自潼關出犯閩鄉靈寶大隊東

行塵埃漲天濶四十里絡繹百里老弱居中精騎居外

左良玉與總兵祖寬兩軍相隔東西七十里遙望山頭

不敢邀擊賊抄掠諸路截燒糧草諸軍乏食秦賊屯于

鄜州綿亘百里已未祖寬破賊整齊王于九嵩賊潰

而為二東走偃鞏南走汝州丙辰羣賊大會于龍門白  
沙連營六十里祖寬分兵襲擊之斬首千餘級羣賊敗  
血東南犇光固入霍邱進逼鳳陽淮督朱大典率兵趨  
壽州 十二月乙酉賊闖王曹操數十萬圍光州昇大  
礮二十座攻城然二礮城拉然崩頽城中頃刻火作賊  
乘而入官吏士民屠戮無遺 漢中羣賊會于漢南戊  
戌雅黎叅將羅于萃連擊敗之窮追賊于子午谷奪其  
所掠子女二千口賊犇饒風關 庚子江北賊陷巢縣

舍山遂襲陷和州

九年正月丁未總理盧象昇師次于鳳陽諸道兵畢會  
壬子闖王闖塌天八大王搖天動七賊連營數十萬  
攻滁州環山為營包絡原隰百餘里行太僕寺卿李覺  
斯知州劉大鞏督率士民固守賊雲梯衝鞠穴地填濠  
百道環攻城頭火輪巨礮相續發司轟毀諸山出賊不  
意縱將士奪其雲梯燔之賊血者衆歛兵稍退夜復進  
攻掘為支河洩濠以涸之賊騎黑牛渡河城上連礮擊

之賊死益衆 癸丑賊退掠邨落山谷婦女數百人裸  
而沓淫之已盡斷其頭孕者則刻其腹環嚮堞植其跗  
而倒埋之露其下私血穢淋漓以厭諸礮守城兵多掩  
面不忍視賊噪呼向城城上燃礮礮皆迸裂或暗不鳴  
城中惶懼覺斯立命取民間圓脰亦數百枚如其數懸  
堞外嚮以厭勝之燃礮皆發賊復大創賊怒攻益急  
甲寅盧象昇合諸道兵馳援滁州祖寬以關遠勁卒為  
前鋒象昇以火攻三營為後勁躬率麾下三百騎居中

督戰昧爽至城下賊以雲梯魚麗肉薄攻城已墮西北  
兩關羊馬墻賊多空營出掠塵起大兵至賊不虞也祖  
寬躍馬而進賊羣起接戰諸將竝至戰于城東五里橋  
官軍踴躍爭奮賊大潰象鼻麾諸軍追之逐北五十里  
積屍相撐枕獲其器械甚衆斬級一千二百朱大典遣  
副將楊世恩復截之于定遠斬六百餘級其東奔者劉  
良佐扼之于廣武賊遂西突池河乙卯賊自池河別道  
出東岡守禦劉光輝等以五百人守東岡賊萬衆並至

孤軍格鬪光輝等力竭赴水死一軍皆沒賊襲其甲裳  
旂幟渡河守者不覺也既畢渡賊乃奪路而走江浦提  
督總兵杜宏域自浦口馳追之不及 丙辰滁州潰奔

諸賊西向鳳陽犯園陵漕撫朱大典總兵楊御蕃列營  
陵墻守甚嚴賊不敢攻遂西渡河焚抄懷遠 丁巳棗

陽土賊廖三袁世儒李玉石以牛酒迎河南大賊張樂  
高讌連夥入營 癸亥江北賊紫薇星陷懷遠甲子朱

大典兵至懷遠賊焚廬舍北渡已丑陷靈璧進逼泗州

副將祖大樂敗賊于永城斬賊首混天王奪驢馬萬

頭 鄖襄賊焚穀城士民空城走 戊辰江北賊陷蕭

縣 巳巳陝西賊陷麟遊 滁陽敗北之賊祖大樂再

破之于永城精銳散亡大半東奔宿州突入沛縣焚僂

婦豎不遺盡掠丁壯入營中 壬申河南別賊陷閩鄉

給事中常自裕上言流寇數十萬最强無過闖王彼

多番漢降丁堅甲鐵騎洪承疇盧象昇即日報斬獲不

過別營小隊耳于闖勢曾無損也今秦賊在宜君鄜州

不過闖將當責成秦撫豫賊在河南汝州者止老回回  
數賊當專責豫撫而督理兩臣宜令揣圖闖王在承疇  
以王承恩孫顯祖等邊兵川兵二萬出關由汝魯疾趨  
光固遏其後在象昇以祖大樂祖寬等關兵董兵二萬  
由息潁奔英六截其前淮撫朱大典提督楊御蕃等屯  
于廬霍防其東突應撫張國維以許自強等屯于潛太  
防其入安慶楚撫王夢尹以秦翼明等屯于麻黃防其  
南衝唐鄧隨棗之間則責鄖撫宋祖舜若獵獸合圍則



賊自無所逃賊渠殲而餘賊自成破竹矣 闖王合掃地王紫金梁等二十四營攻徐州不克遂西陷虞城入河南一字王曹操掃地王五營由歸德趨開封至石家樓辛未祖大樂潛師歸德截其前分兵設伏而以輕兵誘之過賊于雪園既戰官軍佯敗賊爭先馳逐大樂鳴鼓舉麾東西兩翼突出攻賊賊驚大亂官兵三面奮擊斬首一千四百餘級 耶襄賊分為二一往均州一入四川 乙亥羣賊大會于蘭陽盧象昇駐師壽州 二

月丙子賊陷潛山己卯陷太湖 鄆襄賊犯竹山竹山  
自崇禎七年為賊屠陷八年十月知縣黃應鵬僅棲草  
舍數椽至是賊復至應鵬棄城走賊遂入據城有徵糧  
六百石盡為賊有食盡焚縣治而去為空城矣 山西  
饑人相食 甘肅總兵柳紹宗敗賊過天星于西寧州  
過天星合九條龍等八營西掠蘭河南擾會寧洪承疇  
檄左光先與紹宗合兵擊之絕其西奔賊復自萬安走  
鹽池兩軍力戰破之賊窮蹙請降陝西巡撫甘學濶受

其降安插其部數萬人于延安尋延河刼掠如故 三

月丙午山西賊陷和順 兵部奏賊在秦豫山中聞其

向來糧餉多由浙川水運以通荆襄賈販可艘而致之

宜遣將往浙川斷寇報可 丁未賊九條龍張胖子從

南漳柳池陷穀城官山逼保康二千里焚掠靡遺庚戌

陷竹溪房縣知保康城空不入總理盧象昇率諸將追

賊至穀城丁巳賊走鄖州官軍三道並進大霧賊迷道

不知兵至倉猝接戰奔山官軍逐之賊顛而墜者無筭

殺賊將黑煞神飛山虎追奔數十里屍填溝壑時河南  
巡撫亦討內鄉淅川餘寇祖寬李重鎮兵由荆門達荆  
州防其奔軼會秦翼明楊世臣等搜山祖大樂由光鄧  
夾擊江北賊略盡河南賊少大寇俱遁秦楚萬山之中  
象昇言秦豫楚大山綿亘千里賊出沒無端若奮勦窮  
追何地可歇凡崇岡峻嶺密菁深林扳木懸崖日行三  
四十里馬不能進人苦于登此時折色銀無所用本色  
糧無從運車驢無所施勢必以人負米二斗隨兵來往

日食一升一供兵一自贍十日而二斗之糧盡毋論此  
十日內遇賊勝負而以千兵入須千人肩運萬兵入須  
萬人肩運即賊不出而俱歸于盡矣 唐王聿鍵奏南  
陽游饑有母烹其女者 癸亥陝西巡撫甘學濶削籍  
聽勘以孫傳庭代之 乙丑賊闖王蝎子塊自興安入  
漢中 甲戌撫治鄖陽宋祖舜削籍以追寇失利亡其  
符印 四月以苗胙土撫治鄖陽 免上津等十五州  
縣田租 辛丑總理盧象昇會師次于洛陽 五月癸

丑下詔大赦山陝脇從羣盜令地方多方安插以消反側違者重治之 是月陝賊過天星復叛于延安謀渡

河入山西李自成老回回混十萬等數部自楚豫入商南維南大嶺 總兵秦翼明擊賊南漳山中敗之 總

兵俞冲霄擊賊安定恃捷輕進敗沒 命職方員外郎

包鳳起賫詔招撫羣盜 六月乙酉洪承疇上言秦中

兵今實數共騎步一萬三千有奇見選川兵五千有奇俱步卒專藍田商維等處堵勦秦豫接界之寇先是闖

將李自成衆約三四萬混天王衆約二萬過天星滿天  
星衆約二三萬歷次勦散混天王逃延綏定邊勢孤復  
合闖將過天星滿天星等今奔延綏等處猶可督責收  
拾闖塌天闖王蝎子塊俱出鄖襄已奔興安漢中進則  
入三秦退可犯楚豫亟宜合兵湊餉力圖協勦 七月  
癸丑陝西賊陷成縣 壬戌巡撫陝西孫傳庭擊賊于  
盤屋大破之擒賊首闖王高迎祥及劉哲等獻俘闕下  
磔于市蝎子塊走河西 八月庚辰老回回焚開封西

關時羣盜出沒豫楚間屢斲散而復合 九月京師戒  
嚴命總理盧象昇總督各鎮兵入援癸亥改象昇總督  
宣大山西軍務初象昇方追賊至鄖西聞警言以師入衛  
遂有改督之命時闖王已誅蝸子塊已為象昇追逐入  
秦河南少寧自羣盜擾河南北者三年夾河千里鷄犬  
無聲關市盡空荒村深谷殘黎多夜伏豐草深林中採  
野穗以食田壠間亂木枒槎皆成拱矣虎狼千百成羣  
杳非人境賊既無可掠而象昇合大軍于中原羅而蹙



之羣盜盡入楚疆悉銳以相持及是象昇既以關遠之  
兵北去老回回等盤踞鄖襄間休糧息馬秋高足食乃  
以全軍合曹操闖塌天諸賊共二十萬沿江長驅而下  
蘄黃六合懷寧望江江浦所在告警烽火及于儀揚矣  
壬戌寇至尉氏甲子至登封至汝南于是寇復入河  
南矣 己巳以兵部侍郎王家禎巡撫河南總理直隸  
川湖山陝軍務 十月甲申河南賊陷襄城 漢南賊  
陷褒城 十二月以鄖襄賊逞罷撫治都御史苗胙土

以陳良訓代之

十年正月丙午老回回等趨桐城 丁未總兵秦翼明  
逐賊于麻城黃岡間敗之老回回所部整齊王八大王  
九營潰而為四一支走羅田一支走團風鎮一支向蕪  
水一支趨歧亭闖塌天等諸賊分兩路至江北一自桐  
城犯廬江舒城一由光固踰霍山六安東行各分為數  
十股分擾江北戊午淮撫朱大典馳赴之時諸賊混天  
星侵軼商洛李自成縱橫西安過天星盤踞汧隴獨行

狼在漢南蝎子塊在河西與西番合謀其餘楚賊盡在江北而豫賊亦自光固而南會之應天巡撫張國維駐師京口沿江戒嚴甲子別賊自潁毫趨滁州營火夜燭數十里羣賊會之至池河禮醮于大山寺薦拔亡者遂分屯大江小江皇甫常山諸山儀真六合人民俱倚擔而立二月左良玉大破賊于舒城六安連戰三捷秦翼明敗闖塌天子細石嶺擒賊首一條葱新來虎賊至英山分營山險伐竹為筏謀渡江潛竄大山中張國維

檄左良玉入山搜捕良玉新立功驕蹇不奉調發憚入  
山險屯于舒城逾月擁降丁萬人軍中婦豎數千為營  
環數十里所至焚劫壯丁衣緋橫行邛集為虛國維三  
檄之始自舒城進發賊已飽掠出境山西總兵王忠以  
兵援河南稱病數月不進一軍噪而西歸給事中凌義  
渠劾之詔逮王忠入都革良玉職殺賊自贖 乙酉命  
陝西巡撫孫傳庭兼總理河南 閏四月壬寅以熊文  
燦為兵部尚書兼副都御史總理直隸山陝川湖軍務

督勦流寇時文燦新平閩寇有威望故有是命 大旱

羣盜盤踞江北老回回等八營謀避暑六安乃散入

潛山太湖諸嶺蔭林樾以息馬時出抄略因分屯醉石嶺諸路離安慶四十里而軍 河南巡撫陳必謙罷以

常道立代之 廷議大發兵計臣苦于無餉兵部尚書

楊嗣昌建議因改糧為均輸以濟軍食因加賦二萬兩

下詔有暫累吾民一年除此腹心大患等語 五月鄖

襄賊犯蘄州焚荆王墳園 七月以史可法為右僉都

御史巡撫安廬池太等處軍務時以寇患故創設 丁

亥江北賊陷六合遂圍天長 八月戊申賊突入鳳陽

掠械器而出渡河分往河南泗州 十月陝賊過天星

同李自成入蜀混天王蝎子塊隨之川兵大敗混蝎二

賊于廣元斬首千級 十一月庚寅兵部尚書楊嗣昌

請限勦寇之期令秦撫斷商南雒南鄖撫斷鄖襄楚撫

斷常德黃州安慶撫斷英六鳳撫斷潁亳應撫截潛山

太和江西撫截黃梅廣濟東撫截徐宿晉撫截陝州靈

寶保定撫扼渡延津一帶總理熊文燦提邊兵太監劉元斌提禁旅豫撫率左良玉陳永福等兵合勦中原從之 癸巳江北賊陷靈璧 十二月禁軍大集于襄陽賊盡走鄖西 乙巳以戴東旻為都御史撫治鄖陽命洪承疇合孫傳庭并勦河南寇

十一年正月總兵左良玉陳洪範大破賊于鄖西 二月巡按河南御史張任學改都督僉事總兵官鎮守河南任學欲薦故丹徒縣知縣張放極詆諸總兵不足恃

盛稱文吏原有竒才可以禦寇故有是命 三月戶部  
主事張縉彥言臣任清澗知縣于兵情賊勢親見有素  
盜賊之得勢在流而賊之失勢在止賊之長技在分而  
賊之窮技在合賊之乘時在秋夏而賊之失時在冬春  
昔大賊王嘉胤破河曲據其城曹文詔等奪門砍殺而  
嘉胤殲李老柴破中都據其城巡撫練國事督兵攻圍  
而老柴擒神一元破寧塞據其城左光先等與戰而一  
元死譚雄破安塞據其城王承恩等攻圍而譚雄誅此



皆守而不去之賊故速死也過天星老回回混十萬等  
所破城邑無筭官軍未至旋即奔逸此皆流而不居之  
賊故緩死也賊入晉豫分頭成部自秦及汝維以至江  
北無處不被賊豈賊真有數十百萬蓋分股以披其黨  
牽掣我兵故見多也前總督陳竒瑜驅天下之賊盡入  
漢中出棧道關正可一鼓而滅乃以招安致敗不可復  
收古人以八日而平賊數萬者利其合也夏秋之間芻  
糧盡在場圃足供士馬之資冬春非破城攻堡不能得

食官兵促之則尤易故時有利有不利也今若欲破賊  
惟在亂其所長而使之短破其所得而使之失直截以  
攻之分番兩軍一追一駐賊當之必破矣賊黨雖衆大  
都觀望其先倡者不過一二支故盡一股則論賞不必  
事平彙敘縱一股則論罰不許報級塞責賊不望風而  
靡未之有也上是之 四月丙申奪總督洪承疇尚書  
爵仍以侍郎總督總兵左光先曹變蛟並奪五級限五  
月盡賊 六月逮湖廣巡撫余應桂以方孔炤代之

八月總督洪承疇報陝西賊勦降畧盡命出關向河南

湖廣 癸卯江北賊陷睢寧 曹操會羣盜過天星托

天王十反王整齊王小秦王混世王整十萬革里眼于

陝州遂南走內鄉浙川犯襄陽 九月庚申熊文燦次

于襄陽甲子遣副將龍在田邀擊革里眼射塌天子雙

溝大破之老回回等俱東奔棗陽諸軍追逐數十里斬

首六千級奪其牛馬騾萬頭羣盜披靡四逸曹操獨留

內浙山中勢孤守險自保文燦檄良玉洪範進兵浙川

招安羣賊 十月京師戒嚴召孫傳庭于陝西召洪承疇于三邊于是承疇傳庭率諸將合兵五萬先後出潼關入援曹操聞之謂為勦已也率九營從鄖陽淺渚亂流而涉突走均州叩太和山提督太監李維政乞撫維政為言于文燦文燦乃檄止諸軍曹操九營俱就撫文燦上言請貸其罪令諸將宴曹操于迎恩官署授操為游擊將軍供億甚備曹操名羅汝才 庚戌以丁啟睿為都御史巡撫陝西 羅汝才既撫分屯羣賊于房竹

保障四邑自言不願受署為官并不願食餉願為百姓  
耕田此中而已文燦一切為羈縻檄汝才解散脇從諸  
衆簡驍壯從征立功汝才不聽因與鄖均諸邑居民分  
地錯壤而居時張獻忠亦就撫屯穀城汝才遙與為聲  
援 撫治鄖陽戴東旻奏曰曹操過天星十數大寇近  
以理臣襄陽之捷回草東逸曹操就撫分插其衆于鄖  
均諸邑不從解散之令且曰願為百姓耕田此目前盜  
鈴之說耳張獻忠入據穀城屢檄不前將俟民間田熟

分其夏秋之糧稍不遂意干戈遂起荆襄重地今數省  
大寇環聚二三百里羽翼已成將有不可言者然各賊  
盡聚鄖地四面合圍有釜魚穿獸之勢以理臣各鎮現  
在兵馬再令督臣發秦兵由興安馳赴協同掃蕩渠魁  
授首脅從盡散此實蕩平之機也 十二月改洪承疇  
薊遼總督孫傳庭保定總督傳庭以失聰辭上不許尋  
逮傳庭繫獄

十二年正月癸未巡撫河南常道立削藉以縱寇渡河

也以李仙風代之 二月左良玉大破河南賊飛虎劉

國能于許州國能降 老回回既東奔請降于監軍孔

貞會未決革裡眼射塌天等東走合于混十萬分掠信

陽光山 三月羣盜集于固始東北阻河河上之兵嚴

守不得渡羣盜乃趨六安息馬茶山以避夏 庚午逮

河南總兵張任學 左良玉大敗河南賊于內鄉上聞

其步兵淫掠責之 四月戊子撫治鄖陽戴東旻免以

王鰲永代之 辛卯左良玉再破射塌天老回回改世

王于河南之鎮城射塌天乞撫連營百里奪民二麥以  
自給良玉遣人諭止之不聽 戊申良玉率副將陳永  
福金聲桓會兵壓賊壘賊倉卒接戰諸大軍擊之斬首  
二千七百賊退保山險良玉遣降將劉國能招之 庚  
戌射塌天李萬慶率其衆四千解甲詣內鄉城下降于  
良玉良玉言于文燦文燦署國能為守備其黨散去七  
千餘人賊渡淮走光山或走黃州境革裏眼走商城  
六月張獻忠復叛于穀城羅汝才九營並起應之七月



二賊合于房縣左良玉追及之大敗而還良玉失其符

印事聞草文燦任仍視事降良玉職戴罪殺賊 安慶

巡撫史可法以憂歸 初文燦與大學士楊嗣昌深相

結納嗣昌冀文燦成功以結上知文燦既債嗣昌內不

自安請督師南討上甚慰勞之 八月壬戌命大學士

嗣昌以兵部尚書督師討賊賜尚方劍并督師輔臣銀

印給帑金四萬賞功牌千五百蟒紵緋絹各五百 九

月丁卯嗣昌陸辭上宴于平臺後殿上手觴嗣昌三爵

賜詩勒詩于各文廟嗣昌南征會兵十萬本折色銀二  
百餘萬兩 十月嗣昌至襄陽入熊文燦軍中詔逮文  
燦入京論死棄西市 丙子拜左良玉為平賊將軍良  
玉所部多降將嗣昌謂可倚以辦賊為請于上故有是  
命 老回回草裡眼左金王南營四股合二萬人分屯  
英霍潛太諸山寨突犯安慶桐城諸路遼將黃得功川  
將杜先春屢戰却賊賊每避兩軍賊多購蘄黃人為間  
或攜藥囊著蔡為醫卜或談青烏姑布星家言或緇流

黃冠或為乞丐戲術分布江皖諸境覘虛實時時突出  
焚掠相持逾年毒流四境 是年兩京河南山東山西  
旱饑

十三年正月乙丑逮湖廣巡撫方孔照命宋一鶴代之  
閏正月督師嗣昌奏辟永州推官萬元吉為軍前監  
紀從之 二月甲子給楊嗣昌萬金賜斗牛服又賜海  
驢馬一棗騮馬一金鞍二嗣昌駐襄陽調兵會勦以陝  
西興安一路失期斬其監軍殷太白 辛未羅汝才掠

信陽尋陷光州 三月丙申嗣昌次荆門立大勦營以  
新募湖南殺手二千人隸之更以戲下騎兵為上將營  
新撫降丁皆隸焉以副將猛如虎將之 四月罷鄖撫  
王鰲永以袁繼咸代之 五月羅汝才過天星七股盡  
入蜀監軍萬元吉扼夔門 癸未賊陷大昌犯夔州石  
砮女帥秦良玉發兵援夔州萬元吉與合兵以舟師由  
巫山上三峡賊十三哨過夔門魚貫而進羅汝才為殿  
官軍遙望不敢擊賊循河而行欲渡川西元吉左良玉

川撫邵捷春俱會于夔州副將賀人龍所將陝兵驍勇善戰而多擁降丁思得總兵號名以統轄之捷春為請于嗣昌初嗣昌以良玉兵強足破賊表佩平賊將軍印良玉進止多不從節度嗣昌乃密疏于朝請以人龍易之後不果人龍始怨 羅過諸賊自夔州山後抄掠官軍分扼諸隘賊掠無所得副將羅于莘擊過天星于鄭家寨敗之過天星以百騎走羣盜既困謀奪興山西走四川總兵鄭嘉棟湖廣副將張應元汪雲鳳會陝西副

將賀人龍李國奇之師赴之賊以奇兵攻尖山寨人龍等諸軍奮呼齊進入賊陣斷賊為二賊皆騎陷泥淖不得馳川兵跳澗谷類猿猱賊潰自相騰踐斬首七百餘生擒自來虎等七十一人奪甲仗馬騾無算賊退屯羊橋四出抄掠石砬兵邀之于馬家寨復斬首七百又追破之留馬堽斬賊首東山虎 庚子賊屯譚家坪南北兩山山頭張幕魚鱗相掩疊諸軍分道並進南山賊拔寨起先走北山賊馳而下逆擊官軍諸軍薄之賊不能

當退守山巔不動官軍仍分兵疾走繞山後前後齊登賊披靡竄走澗谷諸將皆下馬人曳草履一量緣山逐賊自龍溪追奔四十里斬首千一百餘級賊走營仙寺嶺癸卯諸將會秦楚蜀兵擊賊于嶺上諸軍雲合賊營大亂斬首千級秦兵奪羅汝才大旗擒其老管隊副塌天賊突圍遁走七箐坎入于乾溪 丙午羅過諸賊犯夔州下關城羅汝才老而猾多機詐過天星多擁徒衆二賊以智力相倚至是屢戰不利謀歸楚以瞿塘水漲

不得渡反走下關城巡撫捷春檄總兵嘉棟副將應元  
雲鳳以楚兵自夔州出雲陽邀其前監軍元吉督人龍  
等將秦師間道疾走尖山以截之夔府山溪險隘七賊  
連營數萬林樾不能勝營帳酷暑炎歊毒人馬矢熏達  
數十里蚊蚋嗜草間人馬俱病羅過分道西行汝才率  
小秦王上天王混世王一連鷲五營走雲陽尖山壩過  
天星關索二營走雲陽水碓口期同會于開寧戊申人  
龍等追賊至七箐坎賊簡其銳為殿以挑官軍潛以老



營先走人龍擊破殿後兵長驅擣其中堅賊逾山人龍亦逾山夜抵馬溺溪壓城壘而軍是月江北賊陷羅田黃梅貢士吳卿上言流賊肆毒姦宄出沒尤善偵走如官軍在汝潁襄德彼奪鳳陽臨淮一日一夜兼程行數百里光州固始為吳楚往來之要地宜設一道臣于此此亦扼吭之計也然賊分則寡合則衆晝則賊騎相顧夜則賊營遠哨且賊日馳二百里酗酒耽色渴睡不醒若將卒勇敢卸枚夜襲賊不能覺也今兵不殺賊

反以仇民窮鄉男婦匿林逖難割首獻功以愚主將主  
將以愚監紀監紀不知遂奏其功此弊踵行久矣所當  
痛懲者也 六月辛亥昧爽賀人龍等諸將薄賊營賊  
奔已疲秦師三道俱進大噪騰而上賊驚潰秦蜀軍爭  
逐之斬首千二百俘六百人赦其俘一桿鎗自來虎伍  
林三人隸為軍鋒壬子秦軍躡賊而前度賊必設伏以  
邀我遣都司李仲興高光榮勒輕騎先往人龍國竒潛  
以大兵繼之二將已入隘賊伏起兩山間圍之數重二

將戰方酣人龍國奇麾兵並進噪而揚塵聲動山谷圍中奮呼以應之賊圍開四潰斬首五百餘級生擒賊渠掠山虎十六人羅汝才精騎二千餘二日之內俘其部曲四十人斬馘無算精銳殆盡狼籍東走與四營合保其婦豎共萬人走大寧之小嶺諸將扼之于夔東巴外過天星關索走開縣屯南壩知羅汝才東竄而楚蜀兵漸逼因北走丁巳鄭嘉棟率諸將連營躡賊及之于觀音山逐北二十里至于臨江斬首三百餘張應元窮追

至竇山遇賊百餘騎擊殺二十騎餘騎皆大呼釋甲渠  
托天王常國安請降應元止兵裂帛作書令國安所部  
抓地虎馳諭過天星過天星曰必托天王身至為信乃  
降也抓地虎反命庚申賊首高守達率麾下二百騎來  
奔過天星逐之邀止百餘騎來者七十五騎皆關西健  
兒常為楚師軍鋒辛酉過天星西走諸軍拔營逐之至  
新寧西關外賊騎三千不戰而走高守達率其健兒當  
先陷陣賊陣亂馬竄禾中泥驚蹠相騰踐官軍儼而射

之追奔二十里血流稻畦泥徧赤酷日炎赫刀甲皆生  
烟諸軍以泥滑不得馳歛兵壁于風烈鋪諸軍共獲首  
千七百餘級擒賊首流金錘金狗兒奪馬騾三百過關  
二賊東奔達州張應元等進逼之丁卯常國安前驅遇  
賊川楚兵並進斬首二百餘奪其營賊奔袁壩驛設伏  
溝澗中營火出林間如星者二十里明日應元等前驅  
搏戰令常國安高守達繞谷中擣其脇賊伏發戰方接  
國安突出四圍奮呼賊驚墜山澗共斬首九百獲甲仗

弓矢無算生擒滾地狼等一十七人降其管隊可天虎等四十人庚午賊自袁壩東奔開縣至高城諸將分營出戰嘉棟將中軍副將羅于莘將左軍降將楊旭一隻虎將右軍戰于城下賊敗走大昌 七月羅汝才小秦王上天王混世王一連鸞連營踞大寧監軍元吉在夔遣守備劉正國及羅營降丁伍林入其營招之汝才疑以香油坪之役殺我楊羅二將或不赦携正國東走聲言詣夷陵乞撫于督師先是汝才與金翅鵬不相能金

翹鵬常懼為所并至是小秦王金翹鵬相率降于嗣昌  
汝才殺伍林劉國正東走巫山左良玉兵分屯興房二  
竹間汝才屢敗黨羽多降勢益孤而張獻忠時在巴巫  
與良玉相持謀西走汝才遂合于獻忠謀渡川西走

過天星素與獻忠有却前在新寧諸將招之過天星對  
常安國曰作賊非本懷諸將驟攻之狼狽東走聞羅張  
既合益懷不竝立之勢決計歸命左良玉乘勝移師擊  
之過天星惠登相乞降嗣昌令良玉撫其衆七千人簡

其精銳隸良玉軍中安其老弱于鄖西以降將掃地王  
李靖王隸監軍元吉登相清澗人 八月癸丑元吉遣  
降丁入羅汝才營嗣昌復命降將金翅鵬所部飛上天  
入其營招之汝才逡巡未決時張羅新合獻忠懇汝才  
之再降也日說汝才毋為官軍所獲且曰閣部已得過  
天星闕下矣元吉請檄左良玉携惠登相至陳前招汝  
才汝才必聽嗣昌不從汝才降意遂絕 饑民復相煽  
為盜嘯聚太行山所在蓬蠱起應之 江北賊草裏眼左



金王突霍太間上命太監劉元斌監禁軍六千馳赴河

南江北合皖豫兵討之禁軍擊破賊于霍山賊竄走尋

陷麻城黃梅 是月發倉賑河東帑金三萬賑真定山

東河南饑民 給事中戴明說上言荒極盜起蠢動疊

告畿輔淮陽陝西中州所在不一皆緣撫按有司素不

休養饑荒不卹招徠無策迨盜起議勦死于鋒鏑者此

百姓也用兵加餉死于追呼者此百姓也今乞責成撫

按諸臣以卹荒弭盜為第一事上是之 九月上諭河

南巡撫誅勦以平賊為功不必屢報捷級無裨掃蕩

丁亥河南郟縣盜李際遇申請邦任辰張鼎衆至五萬

總兵王繼禹遣游擊高謙擊之一日三捷斬二千餘級

追至尉氏 己丑嗣昌屯巫山先是闕索敗伏深箐中

聞過天星降益懼嗣昌遣人招之闕索見諸降將効力

軍前遂來歸與其黨王光恩謁嗣昌于巫山舟次率其

副楊光甫等數人頓首涕泣請死罪嗣昌撫慰之給以

銀幣光恩延安人光甫鄖陽人所部六千殺傷散亡已

去其半存者三千乃簡其精銳赴軍前殺賊羅汝才之  
入川也凡九股整十萬掃地王小秦王金翅鵬托天王  
過天星關索惟汝才合于獻忠其八相繼俱降矣嗣昌  
飛章以聞叙賚文武將吏有差回左草諸賊走英霍  
逼鳳陽是月秦師大破賊于函谷斬首數千誅蝎子  
瑰餘賊分竄延安慶陽十月嗣昌在夔州令楚將王  
允成楊文富自巴巫趨當陽東勦回草趨楚撫軍宋  
一鶴赴蘄黃協勦命諸將分屯襄鄖承天諸扼要降

將掃地王張一川擊獻賊于梓潼陷陳被擒賊副之監  
軍元吉命卹其妻子于夷陵 十一月陞陝撫丁啓睿  
總督陝西三邊山西河南軍務 河南巡撫李仙風率  
諸將高謙李建武擊河北賊于菜園斬首一千三百餘  
級 十二月楚豫皖兵大集回草懼而乞招撫丙辰監  
軍員外郎楊卓然入二賊營議之 是冬闖賊困于靖  
函蝸子塊既死羣賊滿天星張鈔子邢家米及闖賊部  
將大天王鎮天王一條龍小紅狼九梁星相繼請降闖

賊潰圍而出 是年兩京山東河南山西陝西浙江大旱蝗至冬大饑人相食草木俱盡道殣相望河南土寇並起自真定至河上道路梗塞開州人袁時中聚衆數萬破開州時壽州賊有袁老山一營時中自號小袁營以別之諸賊各有衆數萬惟時中嚴禁羣賊相繼敗死時中走河南

十四年正月甲辰山東土賊李廷實李鼎鉉陷高唐州時山東盜起東平東阿張秋肥城所在皆賊兗州二十

州縣一時嘯聚響應惟濟寧滋陽無盜京畿道梗省直  
餉銀數百萬俱阻于兗州東平州吏胥倡亂迎賊入城  
據之巡撫王國賓發六道官兵防兗州檄總兵劉澤清  
擊破東平賊復其城 河南土賊艾一侯二侯四嘯聚  
數千人封邱知縣蘇茂柏擊破之 二月丁卯河南土  
賊陷新野 張獻忠羅汝才俱自川入楚惟搖天動留  
川東萬元吉留秦蜀兵千八百屯白帝神女之間絕其  
入楚路 戊午河南土寇瓦罐子一斗穀諸盜盡歸于

李自成合攻開封 山東土賊留東阿汶上時東寇益

熾徐德數千里白骨縱橫又旱荒大饑民父子相食行人斷絕 草左諸賊因張羅遠竄豫皖之兵四集急而歸款楊卓然議插之潛太間二盜實無降意借款以緩師而公行肆掠卓然每左右之以塞人責及闖獻陷襄雒草左遂承機復熾倚山剽攻詔朱大典進總督節制諸路鎮撫兵進英霍以討之 己丑魯王捐金數萬募兵于山東以防盜 丙寅河南土賊孟三陷河陰據之

游擊高謙攻圍七晝夜拔之斬孟三 三月草山東巡撫王國寶職命楊御蕃劉澤清會兵勦曹濮賊 是春招安內邱山西餘寇 草左賊五營聞獻忠東來走麻城以勾之湖廣巡撫宋一鶴聞之渡江進兵屯蘄州擒賊謀焚舟斷渡 五月設徐臨通津四鎮以護漕以東寇熾故也 河南土寇袁時中聚衆至二十萬入江北窺鳳泗自宿亳入蒙城土礦羣盜蟻附之丁丑朱大典率諸軍擊敗之率衆保險潛棄牲畜宵遁丁酉總兵劉



良佐簡驍騎自義門追擊五十里賊竄逸深林良佐分  
輕兵追捕明日及賊大隊賊方扼險拒守官軍以火砲  
奮擊之賊大奔自義門至界捕二百里尸撐交橫棄仗  
滿阡陌賊或自經林間或自刎餘或降或逸去二十萬  
衆鳥獸散時中以數百騎宵遁北渡河走入河南所獲  
仗甲弓矢山積 泰安土寇十餘萬掠寧陽曲阜兗州  
所至燔屋廬掠婦女賊蒙婦女以甲冑執刀仗偽為男  
子守營賊則四出焚掠聞青州兵至遂走邳州焚其南

郭至沙溝屠僇嬰穉不遺 庚子犯徐州北關焚之抄  
劫至揚州南沙河店燬漕船十六艘復東北行入東平  
州豐縣土寇十餘萬圍縣城徐州賊合之攻城愈急東  
平賊首李青山屯于梁山 六月兩京山東河南浙江  
旱蝗多饑盜 庚戌草左諸賊陷宿松英山朱大典駐  
師壽州造長槍三千長丈二尺鳥銃三千大閱諸軍數  
萬人刻期入山搜勦賊方分掠諸縣聞之盡合營屯潛  
山 七月庚辰草左陷潛山遂圍麻城督師丁啓睿大

破賊于麻城斬千二百級賊解圍去 九月羅汝才自

南陽趨鄧浙以合于闖賊時獻忠大敗于南陽其衆散

盡闖賊踞河維有衆五十萬故汝才往附之 張獻忠

敗犇命于回章左諸軍同入霍山扼險拒守 十月太

監劉元斌盧九德率京營兵與總兵周遇吉黃得功合

追賊于鳳陽及之元斌留四十日不進城門晝閉縱諸

軍大掠殺樵汲者以冒功已而欲攻城索賂乃免 張

獻忠糾合回章左諸賊自霍太北行會闖賊於河南

十一月襄城守將李萬慶沒于賊萬慶乃降將射塌天也累功至副將至是闖賊陷襄城殺之詔贈都督同知榮祿大夫立祠襄城 十二月傳制朱大典受命督賊專辦五營縱賊流毒全無一効其草職聽勘以高斗光提督鳳陽兼督皖楚豫會勦

十五年正月丙子山東盜平擒李青山入京青山本屠人乘饑嘯聚數萬人屢寇兗州給事范淑泰魯府左相俞起蛟拒之俘青山 辛巳左革陷潛山壬午陷巢縣

二月左草陷全椒 三月丙子草左老回回五股合

步騎數萬趨壽州復以兵合獻忠攻六安袁時中亦會  
之時中旋合于闐 五月丙子草賊陷無為州士民投

河自沉者亡筭 潁州叅將李栩大破左金玉于壽州

癸巳左金玉合回草連營趨潁州以報壽州之役也李

栩偵知之分布步兵伏城東南二十里栩以騎兵迎擊  
戰于城南樊家店伏兵繞其後奮擊敗之斬首千餘

六月草左諸賊復入六安英霍諸山中倚林樾度夏秋

奩復出歲以為常安廬州縣殘破者半官吏咸携印篆  
艤舟理事城中荆榛塞路人烟久斷草里眼入舒城屯  
於板山 癸丑詔逮安廬巡撫鄭二陽鳳陽總督高斗  
光入京馬士英提督鳳陽軍務 七月甲戌草賊毀廬  
州城 八月回草左連營光山羅山一軍掠信陽一軍  
出麻城仍與獻忠合軍 保鎮遊擊趙崇新與賊袁時  
中講撫于夏邑為賊所紿被殺時中復佯就撫詔許其  
投誠自新時中出不備突入蕭縣執知縣以去 九月

老回回分兵犯蕪湖掠桐安草左犯潁州旋北合于闖

賊 十月戊午誅監軍太監劉元斌以征勦縱軍焚掠

也 十一月袁時中會合于闖賊 閏十一月李自成

令其渠賀一龍趨德安以窺黃麻一龍至黃阪阻水不

前止收左良玉殘兵八百人而回先見羅汝才自成大

恨之始忌汝才 河南土寇蜂起大者李好孫學禮李

際遇衆各數萬小者亦數千 十二月袁時中東犯鳳

皖

十六年正月左良玉率衆二十萬避賊東下沿江縱掠  
江南北流土寇降將叛兵白貴小秦王托塔王劉公子  
混江龍管泰山等所在蜂擁俱冒左兵攻剽南都大振  
南都留守諸軍盡列于沿江兩岸不問為兵為賊進兵  
擊之斬千人良玉列狀上兵部自白兵稍戢羣寇始盡  
散 二月湖廣土寇陷澧州常德又陷武岡州殺岷王  
時湖南諸蠻獠皆伺隙土寇勾引攻掠盡歸于闖賊  
三月癸卯闖賊襲殺草里眼左金王并其衆時羣賊俱



歸闖賊聽約束無敢異同惟草里眼恃其衆意不相下  
闖賊置酒宴左草殺之席上草里眼名賀一龍 闖賊  
屯襄陽命羅汝才攻鄖陽久不下多死汝才所部怨闖  
賊 四月甲子朔闖賊數十騎突入汝才營汝才臥未  
起入帳中斬其頭汝才一軍皆譁闖賊以大隊兵脇之  
七日始定所部多散亡降于秦督孫傳庭汝才延安人  
賊中號為曹操以其多智而狡也初隸賊首高迎祥後  
合獻忠又合自成折節下之每破城自成取六汝才取

四汝才戰士四五萬戰馬萬餘騎馬駒廝養不下四五  
十萬闖兵長于攻羅兵長于戰相倚為用汝才老而猶  
嗜聲色每破城邑擇子女之美者數十人後房數百女  
樂數部所至華侈珍食山積酣燕歌舞闖賊每噓之曰  
酒色之徒也以山東人玄珪為謀主每事取決焉闖賊  
并殺珪 五月闖賊攻袁時中殺之初時中困于陳蔡  
間闖賊過而招之許配以女遂為闖前鋒時中畏闖之  
強非心服也時中叛而他徙有衆數萬擾潁亳時通款

于巡按蘇京然終無降意也扶溝諸生以闖賊命招時中時中執送于京斬之復擒闖賊遊騎送于京闖賊大怒以兵二萬攻時中殺之小袁營遂滅于是秦中蠶起之賊大半降于官軍其强者俱為闖賊所併至是而盡惟老回回遂為闖賊所部老回回名馬守應自後止闖獻兩大賊陸沉中原矣

谷應泰曰天禍人國延安盜起揭竿響應所在縱橫亦猶樊崇弄兵于莒而逢安徐宣引衆相附韓

拔陵聚黨于沃野而二夏幽涼叛者遙發此雖同  
惡相濟實繁有徒良亦鋌而走險短于撫御也方  
饑民王嘉胤之倡亂也自成輩從之而白水王二  
邊盜苗美等往往合潰兵以應假令汲黯發河內  
之粟秀實定郭曖之軍則解甲歸農賣刀買犢匪  
異人任也奈何應變乖方蔓延莫制嘉胤擒斬之  
後分顯道神活地草等為三十六營而滿天星侵  
軼商雒過天星盤據汧隴獨行狼屠毒漢南蝎子

塊焚掠河西中原版圖蹂躪盡矣比之芟蕪不剪  
流為臃腫疥癬不治結為大疽以至匠石輟斧而  
躊躇扁鵲望色而却走嗟乎豈不晚哉乃羣盜之  
最可恨者窮則乞降勝即狂逞此則投誠彼即負  
固以故羅汝才之入巴蜀也八部投戈李自成之  
困靖函也九軍歸命及乎孫傳庭盤屋之戰擒闖  
王以獻俘劉良佐左良玉義門之戰破賊兵二十  
餘萬此何異李固之入荊州度尚之臨艾縣而乃

推陷雖多廓清難奏者則以分閫之事權不一前  
門拒虎而後門進狼行間之款附非真豺聲已成  
而鷹眼不化也至于十五年之後表時中既滅老  
回回并營而弱者半降于官軍强者悉隸于閩部  
究至公私塗炭宗社淪胥論者咸謂自成之罪上  
通于天而予未嘗不嘆息痛恨于羣盜也譬猶蠹木  
焉獻忠啄之自成殊之實羣盜攢穴之譬猶逐  
鹿焉獻忠掎之自成攫之實羣盜聚踣之蓋自成


者鷓張之孽而羣盜者蟻附之妖自成者肘腋之憂而羣盜者腹心之疾矣若夫懷宗減膳撤懸則奉天之德音也常自裕合圍獵獸則楊侃之奇策也奈軍士曾無激勸韜鈴絕不奉行卒之周鼎既遷庭堅不祀豈罪已之詔聽者克耳而決勝之條談者掛壁歎嗚呼秦祚之亡關外俱為賊藪隋國之末山東悉屬寇壤懷宗志在蕩平而禍同瓦裂以彼羣狐聚溷蜂蠆有毒也悲夫







明史紀事本末卷七十五



總校官庶吉士臣張能照

校對官編修臣莫瞻菴

謄錄監生臣毛大瀛